

Lomu Polokafo mono wenina Lomu numudo minabo ya lufuwa i fulo betibo ha

Homu ha

Polo ya Kolinti numudofe, ido Senkilia numudo nebo hamenalo ya lufuwa me ya ito, Yesu holi hikito muti Lomu numudo minabo wenina ya fulo betinowe, loto wena ma huliya Fibi muito, lito uto uto Lomu numudo u fedoto ya bibo ne.

Mono weninawa Lomu numudoka minabo wenina maleka ya Yuda wenina ido maleka ya eito feka wenina ya minae. Ido Lomu numuna ya Itali mikalo gamani wenina numunatina meya nabalo ya hiyabatina we wehuditina huliya Sisa ya ne. Aya we yakafo mika negu-negu wenina muki li yoima o betito, wehuditina huliyagi we wenaba ya neimoko minanowe, loto himiwe abi loto idipi molaito, ba lomo uwabo ne.

Ena Polokafo feto loto holibo, mikalo wenina muki ya Goti nomunalo lifima mino ledaibo wenina ya minone. Ido ononate yakafofe, ido mona dowo molanubo yakafo ya li dowo lo ledámanaibo ne. Feto ya nefa, ido Yesu holi hikito munubo, ya Gotikafo lifimate hilili oto, monatina fefe libo wenina minae, loto lo ledanaibo ne, loto Lomu numudo uto hawa ukuwa dowo api itibinowe, loto holito, lufuwa me ya i fulo betibo ne.

Lo oloto molaibo ha

¹ Nemo Polo, Kilisto Yesu houba-nabala we ya aposolo we minanane, loto sune fito, Goti hala ukuwa dowo lo oloto molanane, loto li ekei nedaibo ne.

² Hawa ukuwa dowo ya homu aidena lo molo ledaito, polofetila yasi fele lufuwau iyabo, ³ ya Hipala yagunu lo molo ledaibo ne. Emo ya mikaloka ulagi oloto pibo, ya Defiti yufa fibo wenina yauti oloto piye. ⁴ Ido Weuna ya fele nebo yakafo moda Goti Hipala aubafobo libo we ne, loto lilibibo, ya fuliguti li sinoi edaibo yakafo ya lilibibo ne. Wewa ya Yesu Kilisto Wenabate ya ne. ⁵ Emodokati ya mika negu-negu wenina muki minagu yauti masi ha libo ya holiti, holi hikito muti, hololanabo yagunu huliya yotoko minanaiye, loto aifa li dowo lo ledoto, aposolo ononawa lumito ya li minone. ⁶ Ido aya wenina minagu yauti hemotina yagi Yesu Kilisto weni-nala minae, loto sutina fibo ne.

⁷ Hemotina Gotikafo lula-hala bibo wenina Lomu numudo minabo, ya fele weninane minae, loto sutina fibo wenina, hemotina muki ya lufuwa me ya i fulo betiyowe. Walo.

Metefo Gotidokati ido Wenaba Yesu Kilistodokati ya aifa li dowo lo ledaibo mona ido you amena mona ya hemotinaloka mino betinaiye.

Polokafo weninawa wa betinowe, loto auba ito holibo ha

⁸ Ena homu ha me ya ya lobinogolowe. Holilo. Hemotina holi hikitabo monatina yagunu wenina mikau-mikau lo-lo o minanako, hemotina muki yagunu holito ya dowae, lalowe, loto Yesu Kilisto

huliyalo ya Gotine lomu minowe. ⁹ Holi minafe? Goti ononala li minobo, ya weune-lune-hane mako moloto Hipala hala ukuwa dowo lo oloto molo minowe. Aya Goti yakafo monane muki holibo we onobalalo ya ha me ya lanogolowe. Holilo. Nemo ya hamena-hamena hemotinagunu holito hilitina lomutoko minoto, ¹⁰ ya hemotinaloka anowe, loto holito hiyaba omo yowobo, ya onesa me ya Gotikafo dowo holito hanune li oloto pi nedagetoma ya anowe, loto lomutoko minowe. ¹¹ Feto loto lomuwo, ya hemotina wa betinowe, loto holiyobo, ya Weuna idafala aifa lumibo idafa ya li gedoto oto yakafo auba i betinaiye, loto auba ito holi minobo yagunu feito lomutoko minowe. ¹² Ido feto loto holi minobo, ya hemotinagunuko holiyámowe. Nemogi hemotinagi maina minoto ya hemotina holi hikitabo monatina yakafo nemo lune-hane li aila i nedageto, ido nemo holi hikitobo monane yagi hemotina lutina-hatina li aila i betinaiye, loto holito ya loto wa betinowe, loto lomutoko minowe.

¹³ Ido mono weninane-motao, hemotina holifele ladámotanae, loto ha me ya lobiyowe. Holilo. Eito feka wenina maleka minagu yau mono onona lito hulawa li oloto piyobo, ya hemotina minagu yau ayaidana oto mono ononanelo hulawa ma li oloto pinowe, loto hamena-hamena ya hemotinaloka anowe, loto hanu ma moni wita ofa, ido ha ma-ma oloto pibo yagunu hanune minámito minowe. ¹⁴⁻¹⁵ Wenina muki, Giliki hafi lufuwa wabo ido wagámabo wenina, ha manadinau nebo ido minámibo wenina, muki ya hawa ukuwa dowo lo oloto binobo ononawa nu-

mima nenako, yagunu hemotina Lomu numudo minabo yagi ayaidana oto lo oloto binowe, loto auba ito holiyowe.

Hawa ukuwa dowa ya Goti aubala nebo ha

¹⁶ Hawa ukuwa dowa lo oloto molobo yagunu unelo holiyámobo ne. Ya neidafaitowe? Hawa ukuwa dowa ya Goti aubala nebo ha yakafo holi hikitanabo wenina muki li nomudina wanaibo, ya Yuda wenina li homu moloto, ido yaloti Giliki weninagi wenina maleka muki yagi holi hikitanabo ya li nomudina wanaibo ne. ¹⁷ Aya hawa ukuwa dowa yakafo holi hikitabo wenina ya Goti monala fefe liboma li oloto pi bibo yagunu ya holi hikito mu-mu o minae. Aya yagunu ya fetu libo, Monatina fefe libo wenina ya holi hikito minabo yagunu ya hofawa mino holinigilae, loto ha mono lufuwau (Hab 2:4) ya nebo ne.

Wenina muki Goti metina muti u midipu igu minabo ha

¹⁸ Feito wenina yasi Goti monala metina muti nosámibo mona eito-eito muki molo minabo yagunu ya emokafo okulumaukati lifima ha nabababa li oloto pi beti-beti o ne. Weninawa mona nosámibo molabo yamo ha ona hula ya mi i minae. ¹⁹ Holi minafe? Goti monala maleka, mikaloka wenina holinabo monala, ya emokafo li oloto pi betinako, moda lutinau oloto nebo, ²⁰ ya aidana yoima mika okuluma li oloto pibo hamenaloti ya emo aubala, minowa-minowa oto nebo aubala, ido monala eito, wenina monatina yaidana oto minámibo, yoisa yoto nebo nomudekafo wa edámonibo monala, ya idafa-adafa

lifefe libo idafawa yakafo li oloto pi betito, moda wa edofefe loti monala holiyabo ne. Monala feti holiyaboma nenako, yagunu wenina masi monala holiyámone, loti lanabo ha ma minámiye.

²¹ Goti ne, loti moda holiyafa, ido Gotite ona hula ne, loti huliya li faka ladámoti, dowae, lalowe, loti lomuwámoti, hatina kiyabo mona ya u aifa idafa uto, ido lutina-hatina holifefe ladámibo ya midipukafo wase i betito minae.

²² Feto fe minabo ya ha manadeu ne, lo minafa, ido u holiti holiyámoti abo wenina buliti, ²³ Goti fuli lilitámanaibo we lamenala ya fulititi, fuli lilitanaibo wenina, nama-afa, hidina-adinagi lala iti moniyabo idafa, hudi-hosofa yaidana oti lifefe loti, ya gotite ne, loti holi hikito bi minae.

Wenina muki nosámibo monako molomo uwabo ha

²⁴ Goti lamenala feti fulitanako, eimotina lutina-hatina hume-ugele hopa-napa anabo monagunu holiyabo yagunu fuma ibo mona moloti eimotina lulawatinau ya utina li hopaiti, utinalo holinabo mona ya aifa molanabo ne, loto Gotikafo waito betiye. ²⁵ Weninawa yasi Goti hala monala ona hula ya holi fulititi, sugi we hala monala holi hiki loti, ido idafa-adafa li oloto pibo we ya metina muti, lifefe libo idafa yako holi biti houba-naba o beti minae. Wewa metina muwabo we huliya ya li faka lo edomo yoto minowaminowa oto nebo ne. Ona.

²⁶ Ido metina muwabo yagunu Gotikafo waito betito, ya utinalo holinabo monagunu aku loti holi minoti, ya wenipatina yasi wemoligi fefe loti unanabo mona ya fulitoti, eimotinagu ya hopa

mona molo-molo o minato, ²⁷ ido wemoli yasi ayaidana oti wenipagi fefe loti unanabo mona ya fulitoti, wemoli eito magunu holiti utina so lito we ma hopa li unabo, ya feti sugi hanu moniyabo yagunu eimotina utina-lutina-hatinau ya lifima ha liwila oti li minae.

²⁸ Weninawa yasi Goti hate ki umámanogolone, loti holiyabo yagunu ya Gotikafo hatina-manadina ya u aifa idafalo uwageto hopanapa mona molanae, loto waito betito, ²⁹ ya lutina-hatinau mona nosámibo-asámibo faitoto mino betito, fina lowagunuko holimo yoti, idafa-adafa magi magi linubolae, loti holiti, wenina holi nosámiboko biti, wauwa-mauwa liti hofu beti fuliti, moliya fiti, hotina iti, hatina nosámiboko kimo yowabo mona yamo lutina-hatinau faitoto neto, ya wenina hamadina hiti, ³⁰ ha nosámibo lo betiti, Goti holi nosámibo muti, ha holiti holiyámoti, eimotinagunuko dowá minone, loti holiti, eimotina utina-hulitina li faka loti, nosámibo-asámibo mona hofawa li oloto piti, otinafo metinafo ha labo ya holiyámoti, ³¹ lutina-hatinau holifefe ladámoti, mona ona molámoti, eimotina weninatina ya holi biyámoti, muludinau holiyámabo wenina, ³² ya yaidana mona molo minabo wenina moda fuliti u hopa unae, loto Gotikafo lo molaibo ha ma ne, loti holiyafa, aya mona aifa ilalu huti molabo yako minámiye. E'e, onu iti molabo, ya wenina masi mona yaidana molabo ya dowá wa beti minae.

2

Lifima meina dowá ido nosámibo linabo ha

¹ Feito hemotina ya wenina maleka monatina nosámiye, lo beti minabo, ya heimotina monatina yagunu neidafaiye lanabo ne? Wenina magunu ya mona feti-feti molabo ya nosámiye, loti lo-lo abo wenina ya hemotina aya mona molanako, yagunu lo-lo abo hawa ya heimotina yagunugi ya lo minae. ² Ido yaidana mona molo minabo wenina ya Gotikafo lifima ha liwila oto bibo, ya moda ona fefe lotoko bibo ne, loto holi minone.

³ Ido hemotina ya wenina maleka nosámibo mona molabo yagunu lifimatina ne, loti lo beti-beti afa, hemotina ya aya mona molabo yama Gotikafo lifimate liwila oto li lomámanogolaiye, loti hatina kiyafe? ⁴ Ido Goti lula hala-kala aloko ladámito, li you loto dowá lo ledó nebo mona yawala ya monalawa aifa idafa ne, loti hatina kiyafe? Ake, hemotina fetó loti hatina hópá-nápá kiyabo wenina ya Goti li dowá lo ledáibo monawa ya wati lutina-hatina li elepa iyalo, loto monawa molo ledaiye, loti holiyámafe?

⁵ Ido hemotina lutina-hatina gedibo li elepa iyámanako, yagunu hamena nabalo, Gotikafo lifima ha hula, fefe lanaibo ha naba-naba li oloto pi lumunaibo hamenalo ya ha naba-naba linabo ha ya heimotina li nuba o-o o minae. ⁶ Yagunu ha ma fetó libo,

Emokafo ya wenina muki eimotina monatinalo ya liwila oto li binogolaiye, loto ha mono lufuwau (Sng 62:12, Snd 24:12) ya nebo ne. ⁷ Mona dowá molomo yonubo yakáfo hulite ito yoto lamena o ledageto, hofawa minowa-minowa oto mino holinogolone, loti holiti ya auba iti mona dowá molo minanabo

wenina ya hofawa minowa-minowa oto mino holinabo mona ya binogolaiye. ⁸ Ido wenina masi eimotinagunuko holiti, ha ona hula metina muti nosámibo monalo meyalo molo minanabo wenina ya lula hala-kala lagetó, lifima ha naba-naba binogolaiye.

⁹ Holi minafe? Nosámibo mona molo minabo wenina muki ya eimotina monatinalo ya miluma ha, hena naba-naba aibo ha ya linigilae. Feti linabo, ya Yuda wenina u homu uti liyato, ido yalo Giliki weninagi wenina maleka muki yagi linigilae. ¹⁰ Feti linigilafa, ido mona dowá molo minabo wenina muki ya eimotina monatinalo ya you amena mona, lamena mona, hulitina yoibo mona ya linigilae. Feti linabo, ya Yuda wenina u homu uti liyato, ido yalo Giliki weninagi wenina maleka muki yagi linigilae. ¹¹ Moda holiyafe? Goti ya wenina hona moloto ekei ámibo wema ne.

¹² Goti lo molaibo hala liyámabo wenina yasi nosámibo mona molo minabo yamagunuko moda fuliti u hópá unigilae. Lo molaibo hawa yakafo sigiya lo betiyámanogolaiye. Ido lo molaibo hala liyato, aya ha yakafo hiyaba o betibo wenina yasi nosámibo mona molo minabo yamagunu lo molaibo hawa yakafo sigiya lo betito lifima ha liwila oto li binogolaiye. ¹³ Moda holiyafe? Lo molaibo ha ya aifa hatina etuwaloko holinabo ya Goti onobalalo ya monatina fefe libo wenina minae, loto lo betiyámanogolaiye. E'e, lo molaibo ha ya holiti meyalo molanabo yagunuko monatina fefe libo wenina minae, loto lo betinogolaiye.

¹⁴ Yagunu holilo. Eito feka wenina ya lo mo-

laibo ha liyámafa, ido eimotina lutinakafo holiti hawalo hololanabo, ya hawa liyámabo weninawa ya moda eimotina hatina kiyadoti ya moda lo molaibo hawa holiyaboidana oti minae. ¹⁵⁻¹⁶ Feto fe minabo weninawa lutinau ya lo molaibo hawa mino betito ya ononawa libo mona li oloto pi minae. Feito hamena nabalo, ya faluku oto molonibo mona ido lute-hateu faluku oto holiyonibo ha muki ya Gotikafo hona moloto, lifima ha liwila oto lumunaibo hamenalo, ya wenina yasi mona ma molonibo ya moda dowá nefa, ido ma ya nosáminako, lifimate ne, loti hatina kiti weudina-lutina-hatinau holiyabo mona yakafo li oloto pi betinogolaiye. Yagunu ya hawa ukuwa dowá lo oloto molobo, ya Gotikafo lifima hawa liwila oto lumunaibo, ya Yesu Kilisto anau molageto, emokafo hona moloto lumunaibo ne, loto lo oloto molowe.

Yuda wenina yasi lo molaibo ha meyalo molabo aubatina ma mino betiyámibo ha

¹⁷ Ido hemotina ma ya Yuda wenina minone, loti, ido lo molaibo ha ya litumate ne, loti, ido Goti ya leimo Gotite ne, loti heimotina hulitina li faka lo minoti, ¹⁸ ido dowá loto holibo mona ya holifefe loti holiti, ido lo molaibo hakafo api itibitaima nenako, mona-fana dowá lama ya wa dowá moloti, ¹⁹⁻²⁰ ido lo molaibo ha yau holifefe lonibo ha monala ona hula moda li minone, loti holiyabo yagunu ya weudina nomuna likaibo wenina ya hanu dowá itibinubo wenina minone, loti, ido midipu igu moniyabo wenina ya li lamena o betinubo wenina minone, loti, ido holifefe ladámabo

wenina ya holifefe lanabo mona itibinubo wenina minone, loti, ido gedámabo wenina ya api itibinubo wenina minone, loti auba iti holiti, ²¹ hemotina api itibi-itibi abo yamaidana oti heimotina lutina-hatina ya api ilibiyámafe? Ugele ámilo, loti lo-lo aboma nefa heimotina ya ugele mona molo minafe? ²² Ido hume-ugele ámilo, loti lo-lo aboma nefa heimotina ya hume-ugele o minafe? Ido sugi goti yaidana-meidana ya eleka naba hofu betima nefa, heimotina ya wenina masi idafawalo ya hefana-hoba-hobina molagu yati ma ugele li minafe? ²³ Ido lo molaibo ha ya lemo liyonibo ne, loti heimotina hulitina li faka lo-lo aboma nefa hemotina ya aya hawa holiti holiyámoti abo monatina yakafo Goti huliya ito lomafe? ²⁴ Aya mona molabo wenina yagunu fetu libo,

Eito feka wenina yasi heimotina monatina yagunu Goti huliya hamana hi minae, lotu ha mono lufuwau (Ais 52:5, Ese 36:22, 23) ya nebo ne.

Goti anela utinau fukabo ha

²⁵ Goti anela utinau fukabo, ya lo molaibo hawa meyalo molanabo yako moda hulawa minanaibo nefa, ido lo molaibo ha holiti holiyámoti anabo, ya aya monatina yakafo Goti anela utinau nebo ya u minámiboidana anaibo ne. ²⁶ Ido Goti anela utinau fukámabo wenina yasi lo molaibo hawa meyalo molanabo, ya aya mona yakafo anela utinau minámibo ya u mino betiboidana anaibo ne, lotu wa betinogolaiye.

²⁷ Feito ya utinau anela fukámabo wenina lo molaibo hawa meyalo molanabo mona yakafo hemotina mono lufuwa liti anewa utinau mino betifa, lo molaibo hawa holiti holiyámoti o minabo wenina, hemotina lifimatina li oloto pi binogolaiye.

²⁸ Holi minafe? Yuda wenina monatina etuwaloko molabo ya Yuda wenina ona hula minámæ. Ido utina etuwaloko Goti anela fukabo ya anela ona hula mino betiyámiye. ²⁹ E'e, Yuda wenina ona hula ya weudina-lutina-hatinau ya Goti weninala minae. Ido anela ona hula ya weudina-lutina-hatinau ya ne. Lo molaibo ha lufuwa iyabo ya meyalo moloti fukabo idafa ya minámiye. E'e, Weunakafo lutinau molo betibo idafa ya ne. Feti minanabo yagunu wenina yasi luwatina ladámanabo nefa, Goti yakafo luwatina lanaibo ne.

3

Mona nosámibo yakafo mona dowá li oloto piyámanaibo ha

¹ Feito Yuda wenina ya igaidana oti eito feka wenina li fulo betiti dowá minae? Ido Goti anela utinau nebo yakafo igaidana oto li dowá lo betiye? ² Aiyo, li dowá lo betibo idafa hefola minámiye. E'e, u homu molaibo idafa ya Goti eimola hala ya Yuda wenina adinau molaibo ne.

³ Yagunu neidafaiye loto lanune? Maleka yasi halawa ya holi fulitoti, holi hiki ladámabo monawa yakafo Goti ha lido fefe lotoko meyalo molomo yoibo monala ya li fulo edanaife? ⁴ E'e, feito minámiye. Wenina muki ya sugi monako

molo minae, loto wa betiyanogoloba, ido Goti monala ya u ona hulako minowa-minowa oto minanaibo ne, loto wa edanogolone. Feito yagunu ya ha ma feto loto nebo,

Hemo ha lanibo ya moda fefe lotoko lo-lo o minane, loti holinigilae. Ido masi li halo molo hedanabo ya moda li fulo betinogolane, loto ha mono lufuwau (Sng 51:4) ya nebo ne.

⁵ Feto loto nebo nefa, ido nosámibo monate yakafo Goti fefe libo monala li oloto piyagetoma, ya neidafaiye loto lanune? Gotikafo lifima ha naba liwila oto lumibo ya mona nosámibo molaiye, loto lanube? Feto lobo ya mikaloka monaidana moloto lowe. ⁶ Yama minámiye. Feito nebo neko, ya Gotikafo igaidana oto mikaloka wenina monate ya hona molanaibo ne? ⁷ Ido nemo sugi monane yamo ya Goti monala ona hula li oloto pi edomo uto huliya li faka lagetoma, ya lifima ha liwila oto li numibo, ya neidafaito li numibo ne? loto we makafo lanaife? ⁸ Ido nosámibo mona moloto ya li liwila oto hulawa dowá oloto piyokelo, loto lanube? E'e, feto ladámanogoloba, ido wenina masi hamade hiti, feto lo-lo ae, loti lemogunu lo minae. Feto lo minabo wenina ya lifima ha naba liwila oto binaibo ya moda fefe loto binogolaiye.

Wenina muki u hopa unubo mona yako molonibo ha

⁹ Feito ya neidafaiye loto lanune? Yuda wenina ya wenina eitoma li fulo betiti dowá lama mino holiyabo nefe? E'e, feito moda minámiye. Yuda wenina, Giliki wenina, maleka wenina muki ya

nosámibo monate yakafo nala i ledaito minone,
loto ya moda lotonima ne. ¹⁰ Aya yagunu ya ha
mono lufuwau ya ha ma feito nebo,

Mona fefe liboko molabo wenina ya ma
minámæ. Moda ona lowe. Mako magi
minámæ. ¹¹ Holifefe labo wenina yagi ya ma
minámæ. Ido Goti moni witala abo wenina
yagi ya ma minámæ.

¹² Muki ya hanu dowalokati ya u hopa uti, li mako
iti u aifa idafa buliti minae. Mona dowa
molo minabo wenina ya ma minámæ.
Moda ona lowe. Mako magi minámæ.

(Sng14:1-3, 53:1-3)

¹³ Henobatina ya fuliyabo wenina haletina wela
golotibo hale yaidana oto ne. Wetina hu-
luma yakafo weninatina hotina i-i ae. (Sng
5: 9)

Wetina etuwau ya hosofa hifenala yaidana oto
ne. (Sng 140:3)

¹⁴ Wetinau ya ha nosámibo-asámibo ekefa aibo ha
ya faitiye. (Sng 10:7)

¹⁵ Hidina yakafo aloko uti wenina ma hofu beti
fuli-fuli ae.

¹⁶ Wenina li hopa o betiti, hena fulinabo mona
molo beti-beti abo hanudo ya monimo
uuae.

¹⁷ You amena molabo hanu ya ma holámæ. (Ais
59:7-8)

¹⁸ Ido nomudinalo ya Goti ya holiya holiyabo
nomudina molámæ.

(Sng 36:1)

loto ha mono lufuwau ya nebo ne.

¹⁹ Ena lo molaibo ha libo muki ya hawa houba-
naba o edabo wenina lobibo ne, loto holiyone.

Feto loto lobibo, ya mikalo wenina muki monate polito lifimate Gotidoka oloto pi huliye, loti holiyabo yagunu henobatalo inogolaiye, loto lo molaibo hawakafo lobibo ne. ²⁰ Moda holiyafe? Lo molaibo halokati ya monate nosámibo minone, loto holifefe loto holi minoninako, yagunu lo molaibo hawa hololanabo ononawa liyagu yauti wenina ma Gotikafo monatina fefe libo wenina minae, loto lo betinaibo wenina ya ma minámae.

Kilisto holi hikito muwabo yagunuko monatina fefe libo wenina minae, lo betibo ha

²¹ Ido onesa me ya ya Gotikafo monatina fefe libo wenina minae, lo ledaibo mona li oloto pi lumibo, ya lo molaibo ha ido polofeti hatina lufuwa iyagu ya li nuba oto lo oloto molo ledaibo, ya lo molaibo ha meyalo molonibo yagunu ma minámiye. ²² E'e, Yesu Kilisto holi hikito muwabo wenina muki ya holi hikitonibo yagunu ya Gotikafo monatina fefe libo wenina minae, lo ledaibo ne. Feto lo ledaibo, ya wenina hona moloto eika fito lo ledámiye. ²³ E'e, muki wenina ya nosámibo mona moloto, Goti lame-nala li heleuto minone. ²⁴ Feto fe minonibo, ya monatina fefe libo wenina minae, loto lo ledaibo ya leimo mona molonidokati ma minámiye. E'e, Kilisto Yesu meina fito wina ledaibo yagunu monatina fefe libo wenina minae, loto lo ledaibo, ya eimola aifa li dowa lo ledaibo monala yakafo aifa feto fe ledaibo ne.

²⁵ Aya we Kilisto Yesu fuliyageto, lunula yakafo wenina holi hikito munabo yagunu nosámibo mona lifimatina hilili o betinowe, loto Gotikafo

aidena yoimati lo molaibo ne. Feto loto lo molaibo, ya monatina fefe libo wenina minae, lo ledaibo monala ya li oloto pi lumiye. Homu wenina nosámibo-asámibo mona molomo uwabo, ya Gotikafo lifima ha naba aloko li oloto pi biyámoto, li you loto waito betimo wifa,²⁶ ido onesa hamena meleka ya eimola monala fefe liboko nebo li oloto pi lumibo, ya Yesu holi hikito muwabo wenina ya monatina fefe libo wenina minae, lo betibo monala ya moda fefe libo mona ne, loto li oloto pi lumibo ne.

²⁷ Feito neboma nenako, yagunu ute-hulite li faka lanubo hanu ya iga ya ne? Hanuwa moda hu ledaibo ne. Ido nena monakafo hu ledaiye? Lo molaibo ha onona liyonibo mona yakafofe? E'e, holi hikitonibo mona yakafo ute li faka lanubo hanuwa moda hu ledaibo ne. ²⁸ Feito ya wenina masi lo molaibo ha ononawa linabo yagunu ya monatina fefe libo wenina minae, loto lo betiyámanogolaiye. E'e, holi hikitanubo yamagunuko monatina fefe libo wenina minae, loto lo ledanogolaiye, loto holiyone.

²⁹ Ido emo ya Yuda wenina yako Gotitina nefemo? Ido eito feka wenina yagi Gotitina minámife? E'e, moda eito feka wenina yagi Gotitina ne. ³⁰ Goti ya moda mako ya nenako, emokafo anela utinau fukabo wenina holi hikitabo yagunu holito, ido anela utinau fukámabo wenina yagi holi hikitabo yagunu moda ayaidana oto holito, ya monatina fefe libo wenina minae, loto lo betinaibo ne.

³¹ Feito neboma nenako, yagunu holi hikitonibo monawa yakafo lo molaibo ha li aifa idafa

itobe? E'e, feito minámiye. Holi hikitonido yamo lo molaibo ha ya li auba i edone.

4

Abalahamu holi hikitibo yagunu monala fefe libo we ne, loto Gotikafo lo edaibo ha

¹ Feito ya mikaloka awatefo-holofate Abalahamu yamagunu neidafaiye loto lanune? Idafawa yagunu holibo ya neidafaiye loto holibo ne? ² Abalahamu monala fefe lotoko molaibo yagunu Gotikafo monala fefe libo we ne, loto lo edaibo neko, ya eimola ula-huliya li faka lanaibo hanu ma mino edadi ne. Ido Goti nomunalo feito minámiye. ³ Aya yagunu ya ha mono lufuwau ya neidafaiye liye?

Abalahamukafo Goti holi hikito muibo yagunu monala fefe libo we ne, loto lo edaibo ne, loto ha mono lufuwau (Stt 15:6) ya nebo ne.

⁴ Ido onona liyabo wenina meinatina ya onona yawala yakafo aifa li dowa lo betito meinawa aifa biye, loto lobe? E'e, onona liyado ya moda lifima meinawa ya biye, loto holiyone. ⁵ Feito nefa, ido Goti nomunalo ya monate fefe libo wenina minanune, loto nena-idafa anune? Monate u fefe lanaibo onona ya auba ito linuba, ido ogofuwámonibo yagunu Goti monalalo meyalo molámonibo mona lifimate hilili oto monatina fefe libo wenina minae, lo ledaibo we holi hikito munubo, ya holi hikito muwonibo yagunu ya monatina fefe libo wenina minae, loto lo ledanaibo ne.

⁶ Feito Defiti yagi ayaidana oto wenina masi monatina lifefe labo onona liyámafa, ido Gotikafo

monatina fefe libo wenina minae, loto lo betibo wenina ya dowá loti holi minae, loto holito, ⁷yaidana wenina yagunu fetó libo,

Wenina ma lo molaibo ha metina muwabo mona lifimatina ya hilili oto, nosámibo monatina li fuló betibo wenina ya módá dowá loti holi minae.

⁸We ma nosámibo monala yagunu Wenabakafo lifima liwila oto li umámanaibo we ya módá dowá loto holi minanaiye,

loto ha mono lufuwau (Sng 32:1-2) ya nebo ne.

⁹Ido dowá loti holi minabo weninawa ya Goti anela utinau fukabo wenina yagunuko lifemo, ido anela utinau fukámabo wenina yagunugi liye? Aya yagunu ya Abalahamu monala ya lito lobinogolowe. Holilo. Abalahamu holi hik-itibo yagunu monala fefe libo we ne, loto lo edaibo ha ya lo-lo one. ¹⁰Ido nena hamenalo fetó lo edaibo ne? Anela mino edaibo hame-nalo nefemo, ido anelagi minámibo hamenalo ne? Homu anelagi minámibo hamenaloma ya fetó lo edaibo ne. ¹¹Ido anelagi minámido ya holi hikito muibo yagunu monala fefe libo we ne, lo edoto, ya anelawa utinau fukomo un-abo monawa ya aliga liboma nenako, yagunu anelagi minámabo wenina holi hikitabo yagunu monatina fefe libo wenina minae, lo betibo wenina muki ya awatinafo-holofatina Abalahamu ya ne. ¹²Ido anelagi minoti holi hikitabo wenina yagi ya awatinafo-holofatina ya ne. Aya weninawa ya anelawa utinau fukabo yagunuko holiyámoti, awatefo-holofate Abalahamu anelagi minámibo hamenaloma holi hikitibo monalalo

yagi meyalo moloti monimo uwabo yagunu ya awatinafo-holofatina ya ne.

Holi hikitabo wenina muki ya Gotikafo monatina fefe libo wenina minae, lo betibo ha

¹³ Moda holiyafe? Homu aidena Gotikafo Abalahamu lo molo muto libo, hemo ido yufa finanibo wenina ya mikaloka eba muki ya weune fi betiyowe, loto lomuima, ya lo molaibo halo meyalo molaibo yagunu lomuwámiye. Holi hikito muibo yagunu ya monaka fefe libo we minane, loto lo edoto, lo molo muibo hawa ya lomuima ne. ¹⁴ Ido lo molaibo halo meyalo molabo yagunu weune fi betiyowe, loto lobibo neko, ya holi hikitabo monatina u aifa idafa uwadi ne. Ido lo molo bibo ha yagi u hopa uwadi ne. ¹⁵ Yagunu holilo. Lo molaibo ha yakafo lifima ha naba li liwila oto lumiye. Ido lo molaibo ha ma minámibo neko, ya hawa holito holiyámoto onibo mona ya ma minámadi ne.

¹⁶ Feito Gotikafo Abalahamu yufa fibo wenina muki yagunu holito, ya lo molo bibo ha ya hulawa emodoka fedanaiye, loto aifa li dowá lo ledaibo monala yakafo weune fi betiyowe, loto, ya holi hikito muwabo yagunuko lo molo bibo ne. Ido Abalahamu yufa fibo wenina muki yagunu libo, ya lo molaibo hawakafo hiyaba o betibo wenina yagunuko ladámiye. E'e, Abalahamu holi hikitibo monalo meyalo molabo wenina muki yagi Abalahamu ya awatefo-holofate makoma nenako, yagunu lo molo bibo hawa ya hulawa moda lemodoka maina fedanaiye. ¹⁷ Aya yagunu ya fetó libo,

Mikau-mikau wenina muki ya awatinafo-holofatina minanane, loto fulo hedowe, loto ha mono lufuwau (Stt 17:5) nebo ha ya Goti onobalalo moda ona hula gedibo ha ne. Aya Goti holi hikito muibo, ya fuliyabo wenina li hofawa o betito, ido idafa ma minámibo ya aifa oloto piyo, loto li oloto pibo we ya ne.

¹⁸ Abalahamukafo Goti lo molo muibo hawa ya hulawa igaidana oto fedanaiye? loto holámifa, ido auba ito holi hikitoto hawa hulawa moda fedanogolaiye, loto holito hiyabala o ne. Aya hawa fetu loto lo molo muibo,

Yufa finanibo wenina feti minomo unabo ne, loto ha mono lufuwau (Stt 15:5) ya nebo ne. Ido yaloti ha ma yagi fetu loto lo molo muibo,

Mikau-mikau wenina muki ya awatinafo-holofatina minanane,

loto ha mono lufuwau (Stt 17:5) yagi nebo ne.

¹⁹ Fetu loto lo molo muibo hamenalo ya Abalahamu melegela wani hadeti (100) yaidana oto nema nenako, emo ulau ya hipa yufa finobo aubane moda hulibo ne, loto holito, ido olon-afu Sala ulau yagi olufola houmalau minanaibo aubala moda hulotaibo ne, loto holifefe loto holifa, ido aya yagunu hala loiti kiyámoto, holi hikitibo mona u hopa aguwámoto, ²⁰ Goti lo molo edaibo ha yagunu holito holi aifa idafa itámibo, holi hikito mumo yoibo mona yakafo li auba i edaito, Goti huliya li faka loto, ²¹ ya lo molo edaibo hawa ya hulawa li oloto pinaibo aubala ne, loto auba ito holibo, ²² yagunu ya

Monala fefe libo we ne, loto lo edaibo ne, loto ha mono lufuwau (Stt 15:6) ya nebo ne.

²³ Ena fetu loto lo edaibo hawa ya Abalahamu yagunuko lufuwa iyámiye. ²⁴ E'e, leimo Wenabate Yesu fuliguti li sinoi edaibo we holi hikito muwonibo wenina yagunu ayaidana oto monatina fefe libo wenina minae, loto lo ledanogolaiye. ²⁵ Nosámibo mona molonibo yagunu Goti Hipala fulinaiye, loto fulo edaiye. Ido monatina fefe libo wenina minae, loto lo betinowe, loto lemogunu holito ya fuliguti li sinoi edaibo ne.

5

Goti aifa li dowá lo ledaibo monala yagunu holi dowá lotoko minanubo ha

¹ Feito holi hikito muwonibo yagunu Gotikafo monatina fefe libo wenina minae, loto lo ledaito, ya Wenabate Yesu Kilistokafo li liwila oto Gotigi houna i ledaiye. ² Ido emo holi hikito muwonido ya aifa li dowá lo ledaibo lulau yowonibo hanu i ledaito, ayau minonibo ya Goti lamenalau unune, loto holito hiyaba o minoto, ya lute-hateu dowá loto holitoko minone.

³ Ido yako minámiye. Hena naba fedo lumigu yau moda ayaidana oto lute-hateu dowá loto holitoko minone. Ya neidafaitowe? Hena mona-mona o lumuto fedanaibo yakafo lute-hate li auba i ledanogolaiye. ⁴ Ido lute-hate auba inaibo yakafo monate li fefe lo ledageto, Gotikafo dowá loto wa ledanogolaiye. Ido monate fefe lageto, Gotikafo dowá loto wa ledaibo mona yakafo lute-hate li aila i ledageto, emogunu holito hiyabala o minanune. ⁵ Ido hiyabala onibo mona ya hutu

ámanogolaiye. Moda holiyafe? Weuna Fele lumibo yakafu Goti lula-hala lumibo mona ya lute-hateu leki faitibo yagunu ya hiyabala omo yoto hulawa linune, loto dowá loto holitoko minone.

⁶ Yagunu holilo. Lemo aubate minámido ya Gotikafu Yesu hamena molo muito, ya aya hame-nawalo Goti monala molámabo wenina yagunu holito ya fuliye. ⁷ Holi minafe? Monala fefe libo we yagunu holito ana li faka loto fulinaibo we mako ma nefemo, ido minámiye? Ya ma holiyámoba, ido monala dowá lotoko molaibo we yagunu holiti auba iti ana li faka loti fulinabo wenina mako-mako ma minanabo ne, loto hate kiyone. ⁸ Feto loto hate kiyoba, ido lemo monate nosámibo molomo yowonibo hamenalo, ya Kilis-tokafu lemogunu holito ade li faka loto fulibo mona yakafu Goti lula-hala ito yoto holi lumibo mona ya lilibiye.

⁹ Feito onesa me ya lunulakafu lifimate hilili oto, monatina fefe libo wenina minae, loto lo ledainako, aliga ya lifima ha naba binaibo hamena ya emokafu ito yoto li nomude wanaiye. ¹⁰ Holi minafe? Homu ya lemogi Gotigi uwolafo-uwolafo minonido, ya Hipala fulibo mona yakafu li liwila oto Gotigi hutifina ledainako, onesa emogi hutifina onibo yagunu ya fuliguti sinoito minowa-minowa oto nebo mona yakafu ito yoto li nomude wanaiye. ¹¹ Ido yako minámiye. Wen-abate Yesu Kilistokafu li liwila oto Gotigi hutifina ledaibo mona onesa liyonibo yagunu Goti lulau mino edonibo yagunu lute-hateu dowá loto holi-toko minone.

Adamukafo fulibo monala ya lumifa, ido Yesukafo hofawa minowa-minowa aibo monala ya lumibo ha

¹² Feito we mako yakafo nosámibo mona molaibo yama mikaloka lo fedito, ido nosámibo mona yamakafo fuliyabo mona ya fedo bibo, ya ayaidana oto wenina muki yagi nosámibo mona molanako, yagunu muki ya fulimo uwabo ne.

¹³ Holi minafe? Lo molaibo ha biyámibo hame-nalo ya nosámibo mona ya mikaloka nebo ne. Ido lo molaibo ha ma minámanaibo, ya wenina lifimatina feito ne, feito ne, loti holinabo hanu ma minámima nefa, ¹⁴ ido Adamu hamenalalo yati ya fulimo uwabo mona yakafo wenina muki li yoima o betimo uto uto, Mosese hamenalalo yagi ayaidana oto wenina muki ya nosámibo mona molabo, ya Adamu ha holito holiyámoto aibo mona molaibo yaidana oti molámafa, moda fulimo uwabo monawa yakafo li yoima o betito hiyabatina we wenaba yaidana oto mino betibo ne.

Wewa Adamu ya aliga anaibo we Kilisto mebe-mabala oto lilibibo nefa, ¹⁵ ido loitiwa ya hanu eito-eito li oloto piyaima, ya Adamukafo ha holito holiyámoto aibo hanu li oloto pito, ido Gotikafo idafa dowa aifa lumibo hanu li oloto piye. Holi minafe? We ma mako ha holito holiyámoto aibo hanu li oloto pibo yamagunu wenina muki fulimo uwaboma nefa, ido Goti aifa li dowa lo ledaibo monala yakafo, ido we mako Yesu Kilisto aifa li dowa lo ledaibo monala yakafo moda li fulo edoto, idafa dowa aifa lumibo ya wenina muki li oloto pi ledomo wiye.

¹⁶ Ido idafawa aifa lumibo yagi ido wewa mako nosámibo mona molaibo yakafo idafa li oloto pi ledaibo yagi moda eito-eito ne. Wewa Adamu nosámibo monala mako yaloti ya lifima ha naba li oloto pi ledaito, ya Gotikafo wenina muki li halo molo ledoto u hopa unae, loto lo ledaibo nefa, ido ha holito holiyámoto onibo mona lifimate muki ya wewa Kilistokafo li mofuto, ya monatina fefe libo wenina minae, loto lo ledaibo mona ya aifa lumibo ne. ¹⁷ Yagunu ya wewa mako ha holito holiyámoto aibo mona yaloti ya fulimo uwonibo mona yakafo wenina muki li yoima o ledoto hiyabate we wenaba yaidana oto mino ledaibo nefa, ido wewa mako Yesu Kilistodokati ya Gotikafo ito yoto aifa li dowo lo ledaibo monala ido fefe libo monala naba-naba ya aifa lomageto, ya lito nomude hofawa minowa-minowa oto hiyaba wenina naba minomo yonune.

¹⁸ Feito ya wewa Adamu ha holito holiyámoto aibo monala mako yagunu ya wenina muki u hopa unae, loto lo ledaibo yamaidana oto wewa Kilisto fefe libo monala mako yagunugi wenina muki monatina fefe libo wenina minae, loto lo ledainako, nomude hofawa minowa-minowa anubo hanu li oloto pi ledaibo ne. ¹⁹ Holi minafe? Wewa Adamu mako ya ha holámibo mona yakafo wenina abi monatina li nosámibo o betibo yamaidana oto wewa Kilisto mako yagi ha meyalo molaibo mona yakafo wenina abi monatina li fefe libo o betinogolaiye.

²⁰ Feito nefa, ido ha holito holiyámoto onibo mona ya moda oloto pimo unaiye, loto lo molaibo ha ya homi ito lumiye. Ido nosámibo mona

molomo uwonido, ya aifa li dowá lo ledaibo monala ya ito yoto molo ledomo yoibo ne. ²¹ Feto fe ledaibo, ya homu fulimo uwonibo mona yagunu nosámibo monakafo li yoima o ledoto hiyabate we wenaba mino ledaibo yamaidana oto onesa Wenabate Yesu Kilisto yagunu monatina fefe libo wenina minae, lo ledoto ya aifa li dowá lo ledaibo mona yakafo hiyabate we wenaba yaidana oto mino ledaibo, ya hofawa minowa-minowa oti mino holinae, loto feto fe ledaiye.

6

Yesu Kilisto fuliguti li sinoi edaibo monalo ya li homi i ledaibo ha

¹ Yagunu neidafaiye loto lanune? Aifa li dowá lo ledaibo monala ito yoto oloto pi lumunaiye, loto nosámibo mona molo minokelo, loto lanube? ² E'e, feito minámiye! Nosámibo mona moda fuli muwonima nenako, yagunu igaidana oto aya monalo onu ito molomo unubo ne? ³ Ido Kilisto Yesugi keloto noku iyonibo wenina muki ya fuligu yagi maina keloto fuliyoniboma ne, loti ya ma holiyámafe? ⁴ Yagunu holilo. Melafo lamena aubala yakafo Kilisto fuliguti li sinoi edaibo yamaidana oto leimote yagi nomude hofawa minionibo hanu hofawalo ya moni-moni o minanune, loto emo fulito, molo edagu yau lemo noku iyonido ya emogi maina keloto fuliyogeto molo ledabo ne.

⁵ Feito ya emo fuligu yagi maina kelonima nenako, yagunu fuliguti sinoido yagi ayaidana oto kelanogolone. ⁶ Feito keloto, ya nosámibo mona hofa houba-naba o edámanune, loto ute nosámibo

mona molo-molo o nebo aubala ya wako anaibo ne, loto lute lila ya emogi maina yá yofolo moda fulibo ne, loto holi minone. ⁷ Moda holiyafe? Fuliyabo wenina ya nosámibo monakafo nala i betiyámibo ne.

⁸ Ena Kilstogi maina fulitonima nenako, yagunu emogi maina nomude hofawa minanubo ne, loto holi hikitone. ⁹ Feto loto holi hikitonibo, ya Kilsto fuliguti li sinoi edaibo yagunu ya fulinaibo mona ya hofa hiyaba we wenabala minámiboma nenako, moda hofa fuliyámanogolaiye, loto moda holi minone.

¹⁰ Feito fulibo, ya nosámibo mona hamena mako moda fuli mutaifa, ido onesa hofawa nebo, ya Goti yagunuko holito ya oto moloto o-o ne. ¹¹ Yagunu ya hemotina yagi moda ayaidana oti nosámibo mona moda fuli mutoba, ido Kilsto Yesu lulau mino edoto Goti yagunuko holito ya oto moloto o-o minone, loti holitiko minalo.

¹² Feti minoti, ya utina etuwa fuli lilitanaibo dowala loto holibo monalalo meyalo molotanune, loti, ya nosámibo monakafo aya utinau ya hiyabatina we wenaba mino betinowe, loto anaibo, ya holi umámilo. ¹³ Ido utina hina-ana-hofala yakafa fefe ladámibo mona molotanune, loti ya nosámibo mona houba-naba o edámilo. E'e, fuliyaguti sinoiti hofawa minabo wenina yaidana oti minanako, yagunu utina-lutina-hatina ya Goti muti, ido utina hina-ana-hofala muki ya fefe libo mona moloti, Goti ya houba-naba o edalo. ¹⁴ Holi minafe? Hemotina ya lo molaibo ha hilalau minámoti, aifa li dowala lo ledaibo monala

hilalau minama nenako, yagunu nosámibo mona ya hiyabatina we wenaba minámanogolaiye.

Nosámibo mona meyalo molanubo ya aya monakafo nala i ledaibo ha

¹⁵ Yagunu ya nena-idafa feyanune? Lo molaibo ha hilalau minámoto, aifa li dowa lo ledaibo monala hilalau minonima nenako, loto nosámibo mona aifa molanubo nefemo? E'e, feito minámiye! ¹⁶ Hemotina utina-lutina-hatina ya we ma muti hololanune, loti houba-naba o edanabo, ya aya we welalo molo-molo abo yakafo nala i ledaiye, loti ya ma holiyámafe? Feito ya nosámibo monalo molanune, loti hololanabo, ya aya monakafo nala i betiyageto, ya fuliti u hopa unigilae. Ido Goti welalo molanune, loti hololanabo, ya monatina fefe lanogolaiye.

¹⁷⁻¹⁸ Feito homu ya nosámibo monakafo nala i betito, houba-naba o edomo uwabo nefa, ido ha mono hula api itibiyabo ya holiti, lutina-hatina mako moloti hawa meyalo molato, ya nosámibo monawa nalalauti ya wina oto, fefe libo mona nalalau ya molo betito houba-naba o edo minone, loto holito, ya dowae, lalowe, loto Goti lomuwokelo.

¹⁹ Hawa fetu loto lobiyobo, ya hemotina lutina-hatina amika molainako, aifa mikaloka wenina lonibo ha ya lofi moloto lobiyowe. Yagunu holilo. Hemotina homu ya fuma ibo mona ido ha holiti holiyámoti abo mona ya houba-naba o edanune, loti utina hina-ana-hofala muki ya aya monawa molado ya ito yoti holiti holiyámoti abo monawa molomo yowabo yamaidana oti onesa me ya fefe libo mona ya houba-naba o edanune, loti utina

hina-ana-hofala muki ya aya monawa molalo. Feto feyanabo ya fele weninala minanabo ne.

²⁰ Holi minafe? Homu ya nosámibo monakafo nala i betito, houba-naba o edabo hamenalo, ya fefe libo monakafo hiyabatina we wenaba minámibo ne. ²¹ Ido aya hamenalo ya nena idafa hula dowa ma li oloto piyabo ne? E'e, idafa dowa ma minámito, monawa nosámibo yama onesa hatina ki munabo ya utinalo holinabo ibo ne. Aya monawa yakafo moda fulito u hopa unubo hanuwa li oloto pi ne. ²² Feito nefa, ido onesa me ya nosámibo mona nalalauti ya moda wina oto, Goti houba-naba o edabo nalau ya molo betito, ya idafa dowa hula li oloto pi betibo, ya fele mona moloti, hofawa minowa-minowa oti mino holinae.

²³ Moda holiyafe? Nosámibo monadokati meina linubowa ya moda fulito u hopa unubo ya nefa, ido Gotikafo aifa lumibo idafa ya Wenabate Kilisto Yesu lulau mino edoto hofawa minowa-minowa oto mino holinubo ya ne.

7

Fele hanu hofawalo moniyonibo ha

¹ Ido mono weninane-motao, hemotina lo molaibo ha holi minabo wenina ya lobiyowe. Holilo. Wenina nomudina hofawa minabo hamenalo yako lo molaibo ha ya hiyaba we wenabatina ne, loti ya ma holiyámafe? ² Feito ya wena ma wanafo nomuna hofawa minanaibo hamenalo ya lo molaibo hawakafo emogi li hutifina o edaifa, ido wanafo fuliyagetoma, ya wanafogi hutifina aibo hawa nalalauti moda wina aiye. ³ Yagunu

ya wanafo nomuna hofawa minanaibo hame-nalo ya wenawakafo wanafo fulitaito we malo uwagetoma, ya hume-ugelelo moni ne, loto lo edanogoloba, ido wanafo fuliyagetoma ya hawa nalalauti wina oto minainako, we malo unaibo ya hume-ugele ha ma ladámanigilae.

⁴ Feito ya mono weninane-motao, hemotina yagi Kilisto ula hofu fuliyado ya Gotikafo li onu i betito, ya lo molaibo hawa moda fuli mutama nenako, yagunu we ma eito, fuliguti li sinoi edaibo welo uti ya Goti nomunalo moda monatina hula oloto pinae, loto fetu fe betima ne.

⁵ Holi minafe? Homu, lute lilalo mona molomo yowonibo hamenalo, ya fulito u hopa unubo mona hulawa li oloto pi lumunowe, loto nosámibo mona so libo monala uteu ya ononala li nema, ya lo molaibo halokati lito ya aya ononawa nosámibo ilalu huto liye. ⁶ Feito lifa, ido onesa me ya ya nala i ledaibo monawa yauti moda fulitonima nenako, yagunu lo molaibo halokati moda wina ledotaima ne. Fetu fe ledaibo, ya onesa lo molaibo ha lufuwa lila monalalo molanune, loto onona liyámoto, Weuna monala hofawalo molanune, loti onona linae, loto wina ledotaima ne.

Nosámibo monakafo li hopa o ledaibo ha

⁷ Yagunu neidafaiye loto lanune? Lo molaibo ha mona ya nosámibo mona nefe? E'e, feito minámiye! Lo molaibo ha holiyámobo neko, nemo nosámibo mona ya holiyámodi ne. Holi minafe? Lo molaibo ha yakafo fetu libo, Wenina idafatina yagunu holiyámilo,

loto ha mono lufuwau (Kis 20:17, Lo 5:21) nebo ha yakafo lo fuko ledámibo neko, ya idafatínagunu holinubo mona ya nosámibo mona ne, loto holiyámodi ne. ⁸ Ido nosámibo mona yakafo lo molaibo hawa yaloti lito ya lune-haneu ya idafadafatína muki yagunu holimo yowobo mona li oloto pi nedaiye. Yagunu holilo. Lo molaibo ha minámibo neko, ya nosámibo mona moda fuliboidana adi ne.

⁹ Feito nemo homu lo molaibo ha yagunu holiyámobo hamenaloma ya mino holiyobo ne, loto holiyofa, ido aliga, Goti lo molaibo hala holiyodo, ya nosámibo mona sinoito, ¹⁰ ya nemo fulito u hopa unobo we minowe, loto holiyobo ne. Feto loto holiyobo, ya Gotikafo hawa li dowá lo ledageto, mino holinae, loto lo molo ledaifa, ido nemo holito ya moda fulito u hopa unobo ne, loto holiyobo ne. ¹¹ Holi minafe? Nosámibo mona yakafo lo molaibo ha lito ya meyalo molanane, loto hone ibo hanu li oloto pito, hone ito hofó nedo fulibo ne.

¹² Feito ya lo molaibo ha ya fele nebo, ido hawa muki lo molaibo ya moda ha dowá, fefe libo ha, fele ha ya ne. ¹³ Feito neboma nenako, yagunu idafawa dowá ya hofó nedo fulibo idafa ma nefe? E'e, feito minámiye! Nosámibo mona ya hofó nedo fulibo idafa ya ne. Holi minafe? Nosámibo mona ya eimola monala nosámibo ona oloto pinaiye, loto idafawa dowá loto lito ya hofó nedo fulibo hanuwa li oloto pibo, ya lo molaibo hawa yakafo nosámibo monawa ito yoto nosámibo ona ne, loto li oloto pi ledaibo ne.

Lute lilagi ido lute hofawagi ya lowa fina fi minaibo ha

¹⁴ Holi minafe? Lo molaibo ha ya Weunadokati ne, loto holi minoba, ido nemo ya mikaloka we minobo ya nosámibo monakafo nala i nedaito, houba-naba o edo-edo fe minowe. ¹⁵ Feto fe minoto, ya neimo oto moloto obo monane ya holifefe ladámowe. Mona ma molanowe, loto dowa wa edobo mona ya molámofa, ido mona eito, eleka naba hofa nedaibo mona ya molo-molo o minowe. ¹⁶ Feito eleka hofa nedaibo mona molotoma, ya lo molaibo ha dowane, loto hane mako molo lo molaibo halo itowe. ¹⁷ Feito nefa, ido neimo haneloti ya monawa molámowe. E'e, nosámibo mona luneu nebo yamakafo molaiye.

¹⁸ Holi minafe? Nemo mikaloka we minobo nenako, une-lune-hane lilau yau mona dowama minámiye, loto holi minowe. Nemo mona dowamolanobolae, loto holiyofa, ido monawa dowamolanobo aubane ma minámiye. ¹⁹ E'e, ya mona dowamolanowe, loto holiyobo mona ya molámowe. Ido nosámibo eleka hofa nedaibo mona ya molo minowe. ²⁰ Feito minofa, ido eleka hofa nedaibo monawa molo minobo, ya neimo molámowe. E'e, nosámibo mona luneu nebo yamakafo ilalu huto molo ne.

²¹ Yagunu holilo. Neimo mona dowamolanowe, loto holiyobo we lune-haneu ya mona nosámibo mino nedaiye, loto holiyowe. ²² Moda holiyafe? Nemo weune-lune-haneu ya Goti lo molaibo hala ya holi lalo mu minofa, ²³ ido uneu ya ha eito ma weune-lune-hane uwolafo ha yakafo lowa fina fi nedoto, li nosámibo monawa

uneu nebo yamakafo nala i nedo ne, loto holi minowe.

²⁴⁻²⁵ Aiyo, nemo hena naba-naba holiyobo we, ya Goti lo molaibo ha meyalo moloto houba-naba o edomo unowe, loto hane ki minofa, ido une yakafo nosámibo mona lo molaibo ha meyalo moloto houba-naba ononala hopa limo yowowe. Aiyo, feto fe minobo we, ya une fulinaibo idafawa yakafo nala i nedaiguti ya hemakafo wina nedanaiye? Wenabate Yesu Kilisto yagunu ya dowae, lalowe, loto Goti lomu-lomu o minowe.

8

Kilisto Yesu ya lifimate hilili oto, Weuna Fele fulo luteu ledaibo ha

¹ Feito onesa Kilisto Yesu lulau mino edonibo wenina ya lifima ha li liwila oto lomámanogolaiye. ² Moda holiyafe? Hemotina Kilisto Yesu lulau mino edabo yagunu Weunakafo li hofawa o betibo ha lo molaibo yakafo nosámibo mona ido fulinabo mona lo molaibo ha nala i betimo wiguti moda wina betitaima ne.

³ Yagunu holilo. Mikaloka ute-lute-hate ya auba iyáminako, lo molaibo ha ogofuto meyalo molámonibo yagunu Gotikafo eimola Hipala ilifi molaito lumibo ne. Ilifi molaibo, ya nosámibo mona yagunu ilifi molaiye. Ido lumibo, ya nosámibo mona molonibo wenina ute-lute-hate yamaidana oto mikaloka ula-lula-hala ito lumito, ya aya mikaloka ula-lula-hala ya Gotikafo nosámibo mona lifima ha li muibo ne. ⁴ Lifima

ha li muibo, ya lemo mikaloka ute-lute-hate monalalo moniyámoto, Weuna monalalo monimo unubo wenina ya lo molaibo ha fefe libo monala ya lemodoka u unanaiye, loto lifima ha li muibo ne.

⁵ Holi minafe? Mikaloka utina-lutina-hatina monala molabo wenina yasi mikaloka utina-lutina-hatina dowá loti holibo idafa ya hatina ki muwafa, ido Weuna monala molabo wenina yasi Weuna dowá loto holibo idafa ya hatina ki mu minae. ⁶ Moda holiyafe? Mikaloka ute-lute-hate holibo mona ya moda fulito u hopa unubo mona ya nefa, ido Weuna holibo mona ya hofawa mino holimo yoibo mona, you amena mona ya ne. ⁷ Feito ya mikaloka ute-lute-hate holibo mona yakáfo Goti lo molaibo hala meyalo molanaibo ogofuwáminako, ya aya hala meyalo molámoto, Goti uwolafo nebo ⁸ yagunu ya mikaloka utina-lutina-hatina meyalo molabo wenina yasi Goti dowá wa betinaibo mona molanabo ya ogofuwámae.

⁹ Feto fe minafa, ido hemotina lutinau ya Goti Weuna mino betima nenako, yagunu mikaloka utina-lutina-hatina meyalo molámoti, Weuna lulau mino edoti abo monala ya molo minae. Ido Kilisto Weuna lutinau mino betiyámibo wenina ya emo weninala minámae. ¹⁰ Nosámibo mona yakáfo utina ya hofu fulibo nefa, ido lutinau ya Kilisto mino betitoma ya fefe libo wenina minae, loto lo betibo yagunu weudina ya moda hofawa ne. ¹¹ Ido Yesu fuliguti li sinoi edaibo we Weuna ya lutinau mino betitoma, ya aya we, Kilisto fuliguti li sinoi edaibo we yakáfo eimola Weuna lutinau mino betibo yagunu ya utina fulinaibo

idafawa ya li hofawa o betinogolaiye.

Weuna Fele yakafo Goti olufola li ina fi libo ha

¹² Feito ya mono weninane-motao, mikaloka ute-lute-hate yakafo nena idafa lumido ya leimo lifima liwila oto muto monala molanubo ne? Ma minámiye! ¹³ E'e, mikaloka utina-lutina-hatina monala molanabo ya fuliti u hopa unigilafa, ido Weuna mino betibo yakafo mikaloka utina monala ya hofu fulinabo ya hofawa mino holimo yonigilae. ¹⁴ Goti Weunakafo idipito moni minabo wenina muki ya Goti olufola minae. ¹⁵ Holiyafe? Emokafo Weuna bibo, ya holi holi-abo mona yakafo hofa nala i betinaibo weuna ma biyámiye. E'e, Weuna bibo, ya neimo olufone ne, loto li ina fi libo Weuna ya bito, emogi houna i minae. Aya Weuna lulau mino edoto ya Wauwe, Menefo, loto sula fi-fi one.

¹⁶ Weuna eimolakafo ya lemo weudegi mino ledoto ya Goti olufola minone, loto holiyonibo ha ya emogi maina lo oloto pi lumibo ne. ¹⁷ Ido olufola minoninako, emo idafa-adafala olufola weuna fi betibo idafa linogolone. Ido linubo, ya Kilistogi maina lamenalau minanogolone, loto onesa me ya emogi maina hena mofunubo ya Kilisto li nebo idafawa yagi maina linogolone.

Lamenala aliga li oloto pi lumunaibo hamena yagunu holiyonibo ha

¹⁸ Yagunu holilo. Lamenala li oloto pi ledanaibo ya idafa dowá lito nebo ma nenako, hena onesa me ya holiyonibo ya aifa idafaidana ne, loto holiyowe. ¹⁹ Holi minafe? Mika okuluma li oloto pibo idafa-adafa muki ya Goti olufola li oloto pi

betinaibo hamena ya wa edanubolae, loti auba iti holiti, ya hiyaba o-o minae. ²⁰⁻²¹ Idafa-adafawa u aifa idafa wibo, ya eimotina dowā loti holiyabo minámiye. E'e, Gotikafo u aifa idafa unaiye, loto lido, ya aya idafawa fulito lilitibo yoibo monakafo nala i betibo, ya eimola olufola nalauti wina oto li lamenalau molo ledanaido, ya li oloto pibo idafa-adafawa muki yagi wina ageto, ya fulito lilitámoto, aifa dowā lotoko minowa-minowa oto minanogolone, loti holiti hiyaba o-o minae.

²² Yagunu holilo. Wenipa olufotina hedanigili ogofu holiyabo yaidana oti mika okuluma li oloto pibo idafa-adafawa muki li mako itoti ya aidenati ogofu holiti, hai-hai, molomo uti uti, onesa me ya yagi ayaidana otiko minae, loto holiyone. ²³ Ido yako minámiye. Leimo yagi, idafa-adafa lumunaibo yauti hana liyonibo we Weuna ya luteu mino ledaibo wenina, ya emokafo neimo olufone minanae, loto li ina fi libo hula, ya ute wina oto li eimoladoka linaibo hamena yagunu auba ito holito hiyaba oto, ya lute-hateu holikiniliki, loto holito minone. ²⁴ Feito hiyabala onibo yakafo li nomude waibo nefa, ido hula ya nomudekafo moda wa onibo neko, ya idafawa yagunu holito hiyaba ámadi ne. Holi minafe? Wenina nomudinagunu wati li minabo idafa ya igaidana oti idafawagunu holiti hiyaba anae? Moda fetó ámanigilafa, ²⁵ ido nomudegunu wagámonibo idafa yagunu holito hiyabala o minanubo, ya hate mako kito ya linune, loto auba ito hiyabala o minanune.

²⁶ Ido Weuna yagi ayaidana oto lemo weudelute-hate aubala minámibo yagunu holito, ya ade

li faka lo ne. Goti lomunubo, ya igaidana oto fefe loto lomunune? loto holifefe ladámoba, ido Weuna eimolakafo lemogunu holito, luteu ya ha ma wetekafo ogofuto ladámanubo ha ya holikinaliki, loto ade li faka loto Goti lomu-lomu o ne. ²⁷ Feto fe ledaibo we yakafo Goti hala dowa kibo halo meyalo moloto fele weninala yagunu holito lomuinako, yagunu weude-lute-hateu nebo ha muki polibo we Goti yakafo Weuna halau nebo ha ya moda holifefe lo ne.

²⁸ Ido Goti lutina-hatina muwabo wenina, eimola hala dowa kito sutina fibo wenina, ya idafa-adafa muki o bito fedanaibo yakafo li dowa lo betinowe, loto emokafo li mako ito lifefe lo betibo ne, loto holi minone. ²⁹ Feto fe betibo wenina ya aidena yoimati wa beti hulibo, ya Hipane fefelumala anae, loto homu aidenati auba ito lo betibo ne. Feto fe betibo, ya Hipala unalafo-mota abi minanagu yauti emo ya hana Hipane minanaiye, loto feto fe betibo ne. ³⁰ Ido feto loto auba ito lo betido, yalo ya sutina fiye. Ido sutina fido, yalo ya monatina fefe libo wenina minae, loto lo betiye. Ido monatina fefe libo wenina minae, loto lo betido, yalo ya li lamenalau o betibo ne.

Goti lula-hala lumibo monau yati li eito o ledanaibo idafa ma minámibo ha

³¹ Idafawa muki feto fe ledaibo yagunu neidafaiye loto lanune? Goti ya lemogi houna inako, hema ya uwotefo minanaibo ne? ³² Emo ya leimo muki yagunu holito, eimola Hipala waito edámoto, fulinaiye, loto fulo edaibo we yakafo

emogi maina idafa-adafa muki ya igaidana oto aifa lomámanaibo ne? E'e, moda lumunogolaiye.

³³ Ido Gotikafo wa molo ledaibo wenina ya hemakafo li halo molo ledanowe, loto anaibo ne? Gotikafo monatina fefe libo wenina minae, loto lo ledaibo, ³⁴ ya hemakafo lifimatina ne, loto lo ledanaibo ne? Kilisto Yesu fulibo, ya ito yoto li sinoi edaito, ya Goti ana onaleka minoto lemogunu holito lomu-lomu o nebo we ya ne.

³⁵ Emo lula-hala lumibo mona yauti nena idafakafo li eito o ledanaibo ne? Ha hena naba o lumuto fedanaibofe, ido miluma holito hate abi kinubofe, ido li nosámibo o ledanabofe, ido inagunu fulinubofe, ido apako minanubofe ido fulinogolone, loto holi lumunaibofe, ido hofa ledo fulinabofe, ya idafawa yaidana-meidana yakafo Kilisto lula-hala lumibo mona yauti li eito o ledanaibo nefe? E'e, feito minámiye! ³⁶ Idafawa ya Goti weninala o bito fedomo yoibo yagunu ya fetu libo,

Hemo weninaka minonibo yagunu ya hamena-hamena hofa ledo fuli-fuli o minoti, ya sipisipi hofabo yamaidana oto hofa ledanune, loti wa ledabo ne, loto ha mono lufuwau (Sng 44:22) ya nebo ne.

³⁷ Feito nefa, ido Kilisto lula-hala lumibo we mino ledainako, yagunu idafa-adafawa mona-mona o lumuto fedageto ya auba ito li fulo betimo yowone.

³⁸ Holi minafe? Nemo hane auba ito kiyobo, ya fulinubofe, ido aifa minanubofe, ido enisolefe, ido wenabatinafe, ido idafa-adafa onesa fedanaibofe, ido aliga fedanaibofe, ido idafa auba ibo

idafafena mafe, ³⁹ ido yoto nebo idafafe, ido lumuto nebo idafafe, ido idafa-adafa li oloto pibo idafa yaidana-meidana muki yauti makafo Goti lula-hala lumibo monau yati li eito o ledanaibo idafa ma minámiye, loto auba ito holi minowe. Aya lula-hala lumumo yoibo mona ya Wenabate Kilsto Yesu lulau mino edonibo yagunu lumibo ne.

9

Polo ya Isilaeli weninala yagunu holito lula-hala hena aibo ha

¹ Ena nemo Kilsto lulau mino edobo we yakafa ha sugi ladámoto, ha ona lobo, ya Weuna Fele luneu mino nedoto lito, ido neimo yagi weune-lune-hane yauti fetu loto lobiyowe. Holilo. ²⁻³ Mikaloka weninane, Isilaeli wenina yagunu holito lune-hane hena naba-naba aito ogofu holimo yowobo, ya aiyo, hanu ma nebo neko, neimo ya Kilistodokati u hopa uto, ebane ya weninanewa biyodi ne, loto holito Goti lomu minowe.

⁴ Aya Isilaeli weninane, ya Gotikafo neimo olufone minanae, loto li ina fi lito, eimola lame-nala ya mino betito, emogi hutifina betibo ha ido lo molaibo ha ya bito, fele huliyagi numuna nabau ya mono ononala bito, ido ha dowu lo molo bibo, ya feito-feito li dowu lo betinowe, loto lo molo bibo ne. ⁵ Ido awatinafo-holofatina ya ha mono hiyaba we wenaba hulinagi we ya minae. Ido aya wenina yautiko Kilsto ya mikaloka ulagi oloto pito aiye. Aya we Kilsto ya wenina, idafa-adafa, muki ya hiyabatina we

wenaba Goti ya nebo yagunu huliya li faka lo edomo yoto minowa-minowa oto nebo ne. Ona.

⁶ Ido Goti hala lobibo ya u aifa wiye, loti ladámilo. E'e, Isilaelikati oloto piyabo wenina yauti ma ya Isilaeli wenina hula minámabo ne.

⁷ Ido Abalahamu yufa fibo wenina yauti ma yufa fibo wenina hula yagi minámabo ne. E'e, aya yagunu ha ma fetu libo,

Aisaka yufa finaibo wenina yako hemo yufa finanibo wenina hula ya minanabo ne,

loto ha mono lufuwau (Stt 21:12) ya nebo ne.

⁸ Aya ha monawa feito ne: Abalahamu olufofa aifa mikaloka monalokati oloto piyabo ya Gotikafo neimo olufone minanae, loti li ina fi liyámiye. E'e, Goti ha lo molo muido yati oloto pibo olufofa yautiko yufa finanibo wenina hula ya minanigilae, loti libo ne. ⁹ Yagunu ha ma ya fetu libo,

Hamenawa molodo ya liwila oto oto, ologafo

Salakafo hipaka ma hedanogolaiye,

loto lo molo muibo hawa ya ha mono lufuwau (Stt 18: 1 14) ya nebo ne.

¹⁰ Ido yako minámiye. Ha ma yagunugi hatina kifefe lalo. Awatefo-holofate Aisaka mako yakafa olonafo Lebeka lobe hipa houmalau molaibo, ¹¹⁻¹² ya hipawa loiti hedámibo hamenalo ya monatina dowa ido nosámibo ma molámifa, Gotikafo loiti yagunu otinafo Lebeka fetu lomuiibo,

Homu we yakafa ege molaibo we ya houba-naba o edoto hafuwalo minanogolaiye,

loto ha mono lufuwau (Stt 25:23) ya nebo ne.

Fetu loti lomuiibo ha monawa feito ne: Gotikafo

wenina wa molo betinowe, loto, ya weninawa monatina yagunu holito wa molo betiyámiye. E'e, eimola hala dowá kito, sutina fito wa molo betinobo ha ya auba ito minanogolaiye, loto hawa lomuibo ne. ¹³ Aya yagunu ya fetó libo,

Yekopu ya lune-hane muwofa, ido Iso yagunu eleka hofó nedaiye,
loto ha mono lufuwau (Mal 1:2-3) ya nebo ne.

¹⁴ Yagunu neidafaiye loto lanune? Goti monala ya fefe ladámiye, lanube? E'e, feito minámiye.

¹⁵ Aya yagunu ya Mosese fetó lomuibo,

Wenina ma milumatina holito adina li faka lanobo, ya moda neimo hane dowá kito ya milumatina holito adina li faka lanobo ne. Ido wenina magunu lune-haneu holinobo, ya moda neimo hane dowá kito ya lune-haneu holinobo ne,

loto ha mono lufuwau (Kis 33:19) ya nebo ne. ¹⁶ Feito ya wenina lutina-hatina holin-abofe, ido auba ito onona linabo yagunu wa molo betiyámiye. E'e, Goti eimola yakafoko milumatina holito adina li faka lanaibo yagunu wa molo betibo ne.

¹⁷ Aya yagunu ya Felo ya fetó loto lomuibo,

Hemo ya hiyabatina we wehudi minanane, loto li faka lo hedobo, ya nemo aubane hemodoka li oloto piyoto, ya huline mikau-mikau ba loto lo oloto molomo unae, loto li faka lo hedowe,

loto ha mono lufuwau (Kis 9:16) ya nebo ne.

¹⁸ Feito ya eimola hala dowá kito ya wenina ma milumatina holito adina li faka liye. Ido

eimola hala dowa kito ya wenina ma lutina-hatina gedageto minanae, loto li gedo betiye.

¹⁹ Aya yagunu ya hemotina yauti makafo feto lonumunaibo, Aiyo, eimola hala dowa kito mona molo lumibo, ya hemakafo ogofuto monala li elepa ito eito molanaibo ne? E'e, ogofuwámonibo yagunu emokafo neidafaito li halo molo ledaiye? loto loga o nedananibo nefe? ²⁰ E'e, hemo feto loto loga o nedananibo we ya aifa mikaloka we ma minoto, igaidana oto li liwila oto Goti ha lomunane? Aya yagunu ya feto libo,

We makafo haba lito idafa ma lifefe lanaibo, ya idafawa yakafo hemo feito lifefe lo nedanibo ya neidafaito ne? loto wewa ya lomunaibo nefe?

loto ha mono lufuwau (Ais 29:16, 45:9) ya nebo ne. ²¹ Haba masa lifefe lanabo wenina yasi haba liti, filigaleka yauti masa ma dowa idafa wenina nomudina fulinaiboidana aibo idafa lifefe lanune, loti holiti, ido filigaleka yauti masa ma aifa idafa yako lifefe lanune, loti eimotina lutina-hatina holinado ya masawa lifefe lanabo ya nosámanaibo nefe? E'e, eimotina idafatina ma nenako, eimotina lutina-hatina holinado ya moda lifefe lanabo ne.

²² Ido Gotikafo ayaidana oto aubala lilibito lifima ha naba-naba li oloto pinowe, loto holito, ya wenina ma lifima ha naba binaibo wenina ya masa nosámibo yamaidana oti u hopa unabo ne, loto lifefe lo betitaibo nefa, hamena fanafana li you loto waito betibo, ²³ ido wenina ma milumatina holito adina li faka lo betinaibo wenina ya masa dowa yamaidana oti lameneu

minanabo ne, loto homu aidena yoima lifefe lo betitaibo, ya eimola lamena yawala nebo mona li oloto pi biyoto wenina muki holifefe lanae, loto fetoto fe betibo ne. ²⁴ Ido leimo ya milumate holito lamenaneu minanae, loto lifefe lo ledaibo wenina sute fibo, ya Yuda wenina yautiko sute fiyámiye. E'e, eito feka wenina yauti yagi sute fiye.

²⁵ Yagunu ya Hosea lufuwa igu ya fetoto libo, Wenina eito, nemo weninane minámabo wenina, ya neimo weninane minae, loto lo betinogolowe. Ido lune-hane biyámobo wenina, ya lune-hane biyobo weninae, loto lo betinogolowe. (Hos 2:23)

²⁶ Ido hemotina ya nemo weninane minámae, loto lobiyobo ebalo, ayalo ya hofawa minomo yoibo we Goti olufola ya minae, loti lo betinigilae, (Hos 1:10)

loto ha mona lufuwau ya nebo ne.

²⁷⁻²⁸ Ido Isilaeli wenina yagunu ya Aisaiya yagi fetoto loto lo oloto molaibo, Isilaelikati yufa fiyabo wenina ya ho noku sesepa nebo yaidana oti oloto piti minanigilafa, ido Wenabakafo hala ya mikaloka me ya aloko auba ito lifefe lanogolainako, aya wenina abi yauti aifa hefola efo yako li nomudina wanogolaiye,

loto ha mono lufuwau (Ais 10:22-23) ya nebo ne.

²⁹ Ido aya yagunu Aisaiyakafo homu fetoto libo, Wenaba auba yawala yakafo Isilaeli wenina hefola efomako aifa minonigu yauti yufa molanabo ne, loto waito o ledámibo neko, ya numuna me ya Sodomu ido Gomola yaidana oto hofoto ledo fuli huladi ne,

loto ha mono lufuwau (Ais 1:9) ya nebo ne.

³⁰ Yagunu neidafaiye loto lanune? Holilo. Eito feka wenina ya monatina lifefe lanabo onona ya auba iti liyámafa, ido holi hikito muwabo yagunu ya Gotikafo monatina fefe libo wenina minae, loto lo betibo mona ya liyabo ne. ³¹ Ido Isilaeli wenina ya lo molaibo halo monito ya monate fefe libo wenina minanune, loti ononawa auba iti liyafa, ido aya halo ya fefe loti moniyámabo ne. ³² Ya neidafaitowe? Holi hikito muto ya moninune, loti holiyámoti, eimotina onona ya lito moninune, loti o minanako, fefe loti moniyámoti, uteba hofu betinaibo hefanalo ya uteba iti lumu fou labo ne. ³³ Aya yagunu ya fetu libo,

Holilo. Saiyoni numudo ya uteba hofu betito li hopa o betinaibo hefana ya fiyowe. Emotina holi hikito muwabo wenina ya moda utinalo holiyámanigilae,

loto ha mono lufuwau (Ais 8:14, 28:16) ya nebo ne.

10

Isilaeli wenina yasi Goti monala ya holifefe ladámabo ha

¹ Ena mono weninane-motao, Isilaeli weninane yagunu holito Goti lomuwo, ya li nomudina wa betiyageto ya lune-haneu dowa loto holinowe, loto lomumo yowowe. ² Weninawa yasi Goti yagunu auba iti holiyafa, ido holifefe ladámo minae. Aya monatina ya wa betifefe loto ya lowe. ³ Gotikafo monatina fefe libo wenina minae, loto lo ledanaibo mona yagunu holifefe ladámoti, lo

molaibo ha meyalo molanubo ya Goti nomunalo ya monate fefe lanogolaiye, loti eimotina monatina yagunuko holimo yowabo yagunu ya Gotikafo monatina fefe libo wenina minae, lo betinaibo hanu ya metina mu minae.

⁴ Yagunu holilo. Kilistokafo Goti lo molaibo ha ya moda fefe loto meyalo molo hulo fulitaibo, yagunu holi hikitabo wenina muki ya ebate lito eimola fefe libo monalawa ya lemodoka moloto, ya monatina fefe libo wenina minae, loto lo ledaibo ne.

⁵ Holiyafe? Lo molaibo ha meyalo molado ya monatina fefe libo wenina minae, loto lo betinaibo mona yagunu Mosesekafo fetoto loto lufuwaibo,

Lo molaibo ha ononawa linabo wenina ya hawa muki meyalo molanabo yako nomudina hofawa minanae,

loto ha mono lufuwau (Wkp 18:5) ya nebo ne.

⁶ Fetoto loto nebo nefa, ido holi hikitabo yagunu ya monatina fefe libo wenina minae, loto lo betibo mona yagunu fetoto libo,

Hemotina hema ya okulumau yonaibo ne? loti lutina-hatinau holiyámilo,

loto ha mono lufuwau (Lo 30:12) nebo ha, ya yoto Kilisto ilimito lumunune, loti lutina-hatinau holiyámilo, loto libo ne. ⁷ Ido,

Hema ya no-lowa feumau ya lumunaibo ne? loti yagi lutina-hatinau holiyámilo,

loto ha mono lufuwau (Lo 30:13) nebo ha, ya lumuto Kilisto fuliguti li sinoi edoto ilimito yonune, loti yagi lutina-hatinau holiyámilo, loto libo ne.

⁸ Aya ha ya neidafaiye liye?

Hawa ukuwa ya moda hemotinaloka selo moloto minoto, ya lutinau wetinau moda mino betima ne,
loto ha mono lufuwau (Lo 30:14) nebo ha, ya hawa ukuwa holi hikitanæ, loto lo oloto molomolo onibo ha ya ne.

⁹ Moda holiyafe? Hemo ya Yesu ya Wenaba ne, loto wekagunu lo oloto molananibo, ido Gotikafo fuliguti li sinoi edaibo ne, loto lukahakau holi hikitananibo, ya li nomuga wanaibo ne. ¹⁰ Holi minafe? Lutekafo holi hikitanubo ya Gotikafo monatina fefe libo wenina minæ, loto lo ledanogolaiye. Ido wetekafo lo oloto molanubo ya li nomude wanaibo ne.

¹¹ Aya yagunu ya fetto libo,
Emotina holi hikito muwabo wenina muki ya utinalo holiyámanigilæ,
loto ha mono lufuwau (Ais 28:16) ya nebo ne. ¹² Feito ya Yuda wenina, Giliki wenina, eito feka wenina li eito-eito itanaibo ma minámiye. E'e, Wenaba mako ya muki Wenabate nenako, emokafo wenina muki sula finabo ya li dowæ lo betimo yonogolaiye. ¹³ Aya yagunu ya fetto libo,
Wenaba huliyallo sula finabo wenina muki ya li nomudina wanaibo ne,
loto ha mono lufuwau (Jol 2:32) ya nebo ne.

¹⁴ Feito neboma nenako, yagunu masi holi hikito umámabo wenina ya igaidana oti sula finabo ne? Ido hala ukuwa holiyámabo wenina ya igaidana oti holi hikito munabo ne? Ido hawa ukuwa lo oloto molanaibo we ma minámanaibo ya igaidana oti holiabo ne? ¹⁵ Ido

idipi molámanabo ya igaidana oti lo oloto molanabo ne? Aya yagunu ya fetu libo,
 Ha dowá liti loti lo oloto molabo wenina ya hidina omonala ne, loti muludina yoito dowá wa betiyabo ne,
 loto ha mono lufuwau (Ais 52:7) ya nebo ne.

Isilaeli wenina holi hiki ladámabo ha

¹⁶ Feito nefa, ido hawa ukuwa dowá ya ma holiti holiyámoti o minae. Yagunu ya Aisaiyakafo fetu libo,

Wenabao, ha eteme o biyonibo ya hemakafo holi hikito ne?

loto ha mono lufuwau (Ais 53:1) ya nebo ne.

¹⁷ Feito hawa holinabo yako holi hikitanabo ne. Ido Kilisto hala lo oloto molanabo yako holinabo ne.

¹⁸ Feito nebo nefa, ido ha ma lanogolowe. Holilo. Emotina ya hawa ukuwa ya ma holiyámafe? E'e, moda holitabo ne. Aya yagunu ya fetu libo, Notina fefeluma mikau-mikau u fulitaibo, ido ha labo ya eba negu-negu ba lomo u hulibo ne,

loto ha mono lufuwau (Sng 19:4) ya nebo ne.

¹⁹ Ido ha ma lanogolowe. Holilo. Isilaeli wenina yasi holifefe ladámafe? E'e, moda holifefe lotabo ne. Aya yagunu Mosesekafo homu Goti welaloti ya fetu libo,

Nemo ya wenina ma hulitina minámibo ya li faka lo betinobo, ya hemotina wauwa linigilae. Weninawa ha manadinawu minámibo ya adina li faka lo betinobo, ya hemotina lutina hala-kala lanogolaiye,

loto ha mono lufuwau (Lo 32:21) ya nebo ne.

²⁰ Ido aliga Aisaiyakafo Goti welaloti ha ma auba ito feto libo,
 Nemo moni witane ámabo wenina yasi li oloto pi nedabo ne. Nemogunu holiti loga-miga ámabo wenina ya monane li oloto pi biyobo ne,
 loto ha mono lufuwau (Ais 65:1) ya nebo nefa,
²¹ ido Isilaeli wenina yagunu feto libo,
 Lutina-hatina gedito, ha holiti holiyámoti abo wenina ya hamena fana ane sinolo biyobo ne,
 loto ha mono lufuwau (Ais 65:2) ya nebo ne.

11

Isilaeli wenina maleka ya holi hikitoti Goti aifa li dowá lo ledaibo monala liyabo ha

¹ Yagunu ha ma lanogolowe. Holilo. Gotikafo Isilaeli weninala ya meya bife? E'e, feito minámiye! Neimo yagi Isilaeli we, Abalahamu yufa fibo we, Benisamini wenina yauti oloto pito minoboma ne. ² Gotikafo aidena yoimati wa betifefe libo weninala ya meya emo biyámibo ne.

Ido Elaiya hala ha mono lufuwau nebo ya ma holiyámafe? Emokafo Isilaeli wenina sigiya lo betito ya Goti feto loto lomuibo,

³ Wenabao, sokila hi-hi abo folomoka muki ya foki-naki oti hofu o fulitoti, ido polofetika hofu beti fuliyato, ya neimo yako aifa minoto ya hofu nedo fulinune, loti fe minae,

loto ha mono lufuwau (1 Kin 19:1 14) ya nebo ne. ⁴ Feto loto lomuifa, ido Gotikafo ha liwila oto neidafaiye loto lomuibo ne?

Wenina naba-naba seweni tauseni (7,000)
yaidana yasi sugi goti Bali ya hidina
obula fi umámabo wenina ya nemodoka
minanae, loto hiyaba o betiyowe,
loto ya ha mono lufuwau (1 Kin 19:18) ya nebo ne.

⁵ Feito onesa me yagi weninawa yauti
malekaloka ya aifa li dowá lo ledaibo yakafo
weuna fi betito, emo weninala minae. ⁶ Ido aifa li
dowa lo ledaibo monala yakafo fetó fe betima, ya
ononatinadokati ma minámiye. E'e, onona liyabo
yagunu weuna fi betibo neko, ya aifa li dowá lo
ledaibo monawa ya aifa li dowá lo ledaibo ona
hula minámadi ne.

⁷ Yagunu neidafaiye loto lanune? Isilaeli wen-
ina moniti wita abo idafawa ya li oloto piyámito,
ido weuna fi betibo wenina ya moda li oloto
piyato, ido malekaloka ya lutina-hatina gedibo
minanae, loto li gedo betima ne. ⁸ Aya yagunu ya
feto libo,

Nomudina fifi ageto ya wafefe ladámoti, hatina
molageto ya holifefe ladámoti minanae,
loto Gotikafo fetó fe betima nenako, aide-
nati fetó femo uti uti onesa me yagi
ayaidana o minae,

loto ha mono lufuwau (Lo 29:4, Ais 29:10) ya nebo
ne. ⁹ Ido Defitikafo ha ma ya fetó libo,

Idafa-adafa hofó hiti no holiyabo mona yakafo
ika o betito, li helefuku nala i betito, li
uteba i betito, lifimatina liwila oto binaiye,
loto holiyowe. ¹⁰ Nomudina li likageto
ya hofa wagámoti, metina ya huba iti
minowa-minowa oti minanae,

loto ha mono lufuwau (Sng 69:22-23) ya nebo ne.

Gotikafo eito feka wenina li nomudina waibo ha

¹¹ Feito ya ha ma lanogolowe. Holilo. Isilaeli weninawa uteba iyabo, ya lumu fou loti u hopa unabo nefe? E'e, feito minámiye! Gotikafo wauwa lineae, loto, ya holiti holiyámoti abo mona yagunu ya eito feka wenina li nomudina waibo hanu li oloto pi betibo ne. ¹² Feito Isilaeli weninawa holiti holiyámoti abo mona yagunu ya mikaloka wenina muki ya holi hikitoti mino holinabo hanu li oloto pi betimo yoibo ne. Ido Isilaeli weninawa Goti metina muwabo yagunu eito feka wenina yasi emogunu holiti ya holi hikito mumo yowabo ne. Feito neboma nenako, yagunu Isilaeli weninawa liwila oti emotinaloka o hulanabo, ya eito feka wenina mikau-mikau minabo muki yagi moda maina oto yoti holi hikitoti mino holimo yonabo ne.

¹³ Ido hemotina eito feka wenina ya ha me ya lobinogolowe. Holilo. Gotikafo eito feka wenina minagu ya aposolo ononawa linane, loto nilifi molaito obo yagunu lune-hane dowá loto holito ononawa ya li minobo, ¹⁴ ya mikaloka weninane, Isilaeli wenina yasi holiti ya wauwa linabo mona li oloto pi betiyoto, ya emotina yauti malekama li nomudina wanaiye, loto fetó fe minowe. ¹⁵ Yagunu holilo. Gotikafo Isilaeli wenina idipi fulitaido ya wenina muki mika negu-negu yauti liwila oto li emodoka ito houna i betima nenako, yagunu Isilaeli weninawa liwila oto eimoladoka idipito anaibo ya neidafa-neidafa anae? Moda fuliyaguti li sinoi betibo yaidana anigilae.

¹⁶ Mide hofawa yauti hoba-hobina hana apito nanubo, ya ayauti maleka fele ne, loto Goti munubo, ya idafawa muki ya Goti idafala, fele idafa ne. Ido yá ma lufawa ya fele ne, loto Goti munubo, ya yáwa hofala ana muki ya Goti idafala, fele idafa ne. ¹⁷ Ido Isilaeli wenina ya yá olifi dowa idafa numudoka hifiyabo yaidana oti minafa, ido yáwa akawa maleka lekaibo ne. Ido hemotina eito feka wenina ya yá olifi hofuku aifa yoibo yaidana oti minagu yauti akawa maleka haka oto yá olifi dowa idafalo moloto li homi ito hiyaba o betibo, ya yá lufawa yakafo li homi inabo akawa ya yá nowala li umageto yonaibo yaidana oto eimola weninala weudina wela-idafa bito li auba i betigu yau hemotina yagi onesa maina no holiti minae. ¹⁸ Feto o minanako, hemotina ya Isilaeli wenina ya yá akawa yaidana oto li fulitoto, leimo ito yoto li homi i ledaibo ne, loti heimotina utina-lutina-hatina ya ito yowámilo. Ido, e'e, li fulo beti minone, loti heimotina hulitina li faka lanabo, ya ha me ya holifefe loti holilo. Hemotina ya aifa yá akawa yaidana oti minae. Yá lufawa ya li auba i edámabo ne. E'e, yá lufawa yakafo hemotina li auba i beti ne.

¹⁹ Feito hemotina ya Gotikafo leimo li homi i ledanowe, loto aya wenina ya yá akawa yaidana oto lekoto li fulitaibo ne, loti ha liwila oti lanabo, ²⁰ ya moda ha ona lanigilafa, ido hatina kifefe loti holilo. Emotina ya holi hiki ladámabo yagunu lekoto li fulo betima ne. Ido hemotina holi hikito muwabo yagunu ya ayau ya minae. Feito ya heimotina utina-lutina-hatina ito

yowámoti, holiya holiti wati monilo. ²¹ Gotikafo eimola Isilaeli weninala waito betiyámoto, yá akawa yaidana oto lekoto li fulitainako, yagunu hemotina ayaidana oto waito betiyámoto, lekoto li fulo ledotanaiye, loti ya wati monilo.

²² Feito ayalo ya Goti li dowá lo ledaibo monala, ido lifima ha naba li lumibo monala ya fetó loti hatina kifefe loti holilo. Isilaeli wenina maleka, lumu fou labo weninaloka ya lifima ha naba li bibo nefa, ido hemotinaloka ya li dowá lo betiye. Feito nefa, ido hemotina ya dowalau mino edanabo ya moda li dowá lo betinaibo hulawa ya wa minanigilafa, ido fetó feyámanabo ya hemotina ayaidana oto lekoto li fulo betinogolaiye. ²³⁻²⁴ Ido Isilaeli weninawa holi hikitámabo monatina li elepa iti holi hikito munabo, ya emokafo liwila oto li homi i betinogolaiye. Holi minafe? Hofuku aifa yoibo olifi yauti yá akawa ma numudoka hifiyabo olifilo li homi inabo ya ogofuwámafa, ido emokafo hemotina ya haka o betito li homi i betima nenako, yagunu numudoka olifilo eimola yá akawa yagi liwila oto li homi inowe, lanaibo ya moda liwila oto li homi i betinaibo ne. Goti eimola li homi i betinaibo aubala moda mino edainako, holi hikito munabo ya moda fetó fe betinogolaiye.

Gotikafo milumate holibo mona ya wenina muki itibinowe, loto holibo ha

²⁵ Yagunu mono weninane-motao, hemotina ya ha manadeu ne, loti heimotina utina-lutina-hatina li faka lotanae, loto, ya ha ma homu faluku

oto nebo ya holifefe lanae, loto holito ya lobinogolowe. Holilo. Isilaeli wenina yauti malekama ya aidenati lutina-hatina gedito minomo uwabo nefa, ido eito feka wenina emodoka moda o hulanabo hamenalo, ²⁶ ya Isilaeli wenina muki li nomudina wanogolaiye. Aya yagunu fetu libo, Saiyoni obulaloti ya nalauti wina betinaibo we ya loto, Yekopu yufa fibo wenina Goti monala metina muwabo ya lutina-hatina li elepa i betinogolaiye. ²⁷ Feito lifimatina hilili o betinobo hamenalo ya nemogi li hutifina betinowe, loto lo molo biyobo halo yama inaiye,

loto ha mono lufuwau (Ais 59:20-21, Jer 31: 33-34) ya nebo ne.

²⁸ Ena Isilaeli weninawa yasi Kilisto hala ukuwa dowa metina muti Goti uwolafo minabo, ya hemotina eito feka wenina hawa ukuwa holi hikitanabo hanu li oloto pi betinowe, loto holito fetu fe betibo ne. Feito nefa, ido Isilaeli weninawa weuna fi betito lula-hala bi nebo, ya awatinafoholofatina yagunu holito fetu fe betibo ne. ²⁹ Holi minafe? Gotikafo wenina sutina fito, aubala monala aifa bitaibo yama lula-hala li elepa inaibo ma minamiye.

³⁰ Yagunu holilo. Homu ya hemotina eito feka wenina ya Goti hala ya meyalo molámabo nefa, ido onesa ya Isilaeli weninawa meyalo molámanako, hemotina milumatina holibo ne. ³¹ Ido onesa ayaidana oti Isilaeli weninawa yagi halalo ya meyalo molámabo, ya hemotina milumatina holibo mona yagunu ya emotinagi milumatina holibo mona ya onesa linigilae, loto

monawa bibo ne. ³² Feito ya Gotikafo wenina muki li mako o ledoto, halalo meyalo molámonibo monakafo nala i ledaibo wenina ya minae, loto lilibibo, ya muki milumate holibo mona ya molo ledanowe, loto monatewa lilibibo ne.

Goti ebola lanubo ha

³³ Aiyo, Goti ha mananau nebo mona ido idafa-adafa muki holifefe libo mona ya moda yoimati yoimo uto uto holi yoisa itainako, emokafo feto fe betinowe, loto holibo ha ya igaidana oto holifefe lanubo ne? Ido monala ya moni wita oto igaidana oto wafefe lanubo ne? ³⁴ Aya yagunu ya feto libo, Wenaba halau nebo ha ya hemakafo holibo ne?

Ido hala kifefe lanaibo ha ya hemakafo lomuiibo ne? (Ais 40:13)

³⁵ Ido Gotikafo lifima idafa liwila oto numunaiye, loto idafa ma hemakafo muibo ne? (Jop 41:11)

loto ha mono lufuwau ya nebo ne. ³⁶ Yagunu holilo. Mika okuluma idafa-adafa muki ya emodokatiko oloto pito, ido emokafoko mona yawala hiyabatina we wenaba minoto, ido emodokako ya u hulo fulitaima nenako, huliya naba-naba mino edaiboma ya moda minomo yoto minowa-minowa oto nebo ne. Ona.

12

Ute-lute-hate muki ya Goti mu hiki lanubo ha

¹ Feito ya mono weninane-motao, Goti lula-halau holibo mona yagunu holito, ya lune-haneuti ha me ya auba ito lobinogolowe. Holilo. Sokila hi muwabo idafa yamaidana oti

hemotina nomudina hofawa minabo ya utina Goti muilo. Ya eimola fele idafala, dowwa wa edaibo idafa muti houba-naba o edanabo ya etuwako ámoti, weudina-lutina-hatina hulawa yakafa houba-naba o edalo. ² Ido Gotikafo dowwa loto holibo mona, hiluwa loto onobalalo fefe libo mona dowwa ona hula yama holifefe lanune, loti ya mikaloka wenina onesa me ya mona molado ya meyaló molámoti, lutina-hatina hofawa bibo yakafa monatina elepa iti molalo.

Mono auba i ledoto ononalalo fulo ledaibo ha

³ Aifa li dowwa lo ledaibo monala numibo yagunu ya hemotina muki fetó loto lobiyowe. Holifefe lalo. Heimotinagunu ya ito yoti holiyámilo. E'e, Gotikafo holi hikitanabo auba hona molo bido, ayalo ya holoti hatina kifefe lotiko minalo.

⁴ Feito ya ute mako yau hide-ade-hofate muki nebo, ido ononatina yagi mako minámibo, eito-eito nebo ⁵ yamaidana oto mono wenina muki Kilisto lulau mino edonibo ya li mako o ledaito ula mako yaidana oto minoto, ido mono wenina eito-eito ya ula hina-ana-hofala yaidana oto minonibo, ya Kilisto weninala eito muki ya lemo hide-ade-hofate yaidana oti minae. Ido lemo yagi ya hidina-adina-hofatina yaidana oto minone.

⁶ Ido emo aifa li dowwa lo ledaibo monala yakafa ononala linubo auba eito-eito hona moloto aifa lumido, ayalo ya liyokelo. Feito polofeti onona linabo auba bibo, ya holi hikitanabo auba hona molo bido, yalo ya ha welaloti lo oloto molalo.

⁷ Ido mono houba-naba ononala linabo auba bibo, ya houba-naba ononala lilo. Ido wenina api itibinabo auba bibo, ya api itibilo. ⁸ Ido

wenina lutina-hatina li auba i betinaibo auba bibo, ya lutina-hatina li auba i betilo. Ido wa nabo idafatinau yati wa námabo wenina binabo auba bibo, ya lutina-hatina mako moloti fefe loti bilo. Ido hiyaba we minanabo auba bibo, ya auba iti hiyaba dowá lotiko o beti minalo. Ido wenina milumatina holiti adina li faka lo betinabo auba bibo, ya lutina-hatinau dowá loti holiti adina li faka lo betilo.

Weninate lute-hate hulawa binubo ha

⁹ Weninatina lutina-hatina binabo, ya etuwako biyámoti, hulawagi bi-bi o minalo. Ido mona nosámibo ya metina muti, mona dowá yako li hikitoti molotiko minalo. ¹⁰ Ido Goti weninala muki ya leimo weninate ona minae, loti lutina-hatina hulawa bilo. Feti ya heimotina hulitina ito yowámoti, wenina eito muki hulitina li faka lo-lo anabo mona ya itibilo.

¹¹ Ido Wenaba ononala linabo ya henoba ámoti, Weunakafo weudina-lutina-hatinau ya so lamena o ledó, loti ononala auba iti li holiti, houba-naba o edalo. ¹² Hena holinagu ya auba iti minoti, emogunu dowá loto holiti hiyabala oti, lomutiko minalo.

¹³ Fele weninala idafa magunu holinabo ya adina li faka lalo. Ido eba malekati anabo, ya auba iti hiyaba dowá lo betimo yoilo.

¹⁴ Wenina masi li nosámibo o betinabo ya liwila oti li dowá lo betilo. Goti lomuti ya li hopa o betiyo, loti ladámoti, li dowá lo betiyo, loti lomuiilo. ¹⁵ Dowá loto holiyabo weninagi maina dowá loti holiti minalo. Ido hena fuliti hufo o minabo weninagi maina hufo oti mino betilo.

¹⁶ Lutina-hatina mako moloti, ya heimotinagunu holiyabo yamaidana oti mono weninatina yagunugi holilo. Hulite nebo wenina minanune, loti holiyámoti, hidinalo wenina yagi houna i betilo. Ha manadeu ne, loti heimotinagunu holiyámilo.

¹⁷ Ido masi li nosámibo o betinabo, ya liwila oti li nosámibo o betiyámilo. E'e, wenina muki nomudinalo ya mona dowá lotiko molalo.

¹⁸ Heimotina weudina-lutina-hatinau you amenako moloti, ya wenina muki yagi maina you amenako minanune, loti hanuwa auba iti moni wita alo. ¹⁹ Lune-hane biyobo weninane-motao, heimotina ya wenina lifima ha liwila oti biyámilo. Ha muki ya Goti anau moloti, eba muilo. Aya yagunu ya Wenabakafo fetó libo,

Wenina lifima ha binobo ya neimo ononane ma nenako, nemo neimonekafo liwila oto binobo ne,

loto ha mono lufuwau (Lo 32:35) ya nebo ne.

²⁰ Ido ha ma ya fetó libo,

Hemo uwokafo inagunu fuliyagetoma, ya wela-idafo umo. Ido nogunu holiyagetoma, ya no umo. Fetó feyageto, ya mona molo hedaibo yagunu ulalo naba-naba holinaibo ne,

loto ha mono lufuwau (Snd 25:21-22) ya nebo ne.

²¹ Moda holiyafe? Nosámibo monawa yakáfo li yoima o ledámanaiye, loti monawa dowá molanabo yakáfo nosámibo monawa li yoima o edalo.

13

Gamani hiyaba wenina mona molo binubo ha

¹ Ena wenina muki ya gamani hiyabatina wenina hatinalo meyalo molalo. Hiyabate wenina muki ya Goti welalotiko hiyaba o ledaboma ne. Ido emokafo hiyaba o ledabo auba biyámibo neko, ya hiyabate wenina minámadi ne. ² Yagunu hiyaba wenina hatina holi fulitabo wenina ya Goti eimola welaloti ha holiti holiyámoti abo mona molae. Ido ha holiti holiyámoti abo wenina ya eimotina lifima ha liwila oti linabo mona ya molabo ne.

³ Yagunu holilo. Mona dowá molanubo ya hiyabate wenina holitina holiyámanogoloba, ido mona nosámibo molanubo ya moda holitina holinogolone. Yagunu ya hiyaba wenina holitina holiyámanowe, loto holinanibo, ya mona dowá lotoko molo minageto ya heboka lanae. ⁴ Holi minabe? Hiyaba we, Goti ononala libo we yakafo li dowá lo hedanaibo onona liye. Feito nefa, ido mona nosámibo molananibo ya moda holiya holiyo. Emo ya himi li nebo ya aifa liyámiye. E'e, Goti ononala libo we yakafo nosámibo mona molabo wenina ya lifima ha moda liwila oto binaibo ononala li ne. ⁵ Yagunu hiyabate wenina hatinalo meyalo molonibo, ya lifima ha naba litanune, loto holito yagunuko meyalo molanubo ya ogofuwámiye. E'e, meyalo molonibo mona ya moda fefe libo mona ne, loto lute-hateu holito muki yagunu hatinalo meyalo molo minanubo ya moda dowá lanogolaiye.

⁶ Feti Goti ononala liyabo wenina ya minoti, hamena-hamena aya ononawa litoko minama nenako, yagunu hefana takisi yagi ya meina molo-molo o minae. ⁷ Yagunu wenina muki fefe

loti binabo idafa ya bilo. Hefana takisi eito-eito muki ya li-li anabo wenina ya fefe lotiko bilo. Ido hiyabatina wenina ya fefe loti lutina dowa moloti hatinalo meyalo molalo. Ido hulitinagi wenina ya fefe loti hulitina li faka lalo.

Lute-hate bi-bi anubo ha

⁸ Wenina masi lifima o betinado ya aloko liwila oti bi hulalo. Lifima mako yako liwila bi huladámánubo, ya lute-hate binubo mona ya ne. Holi minafe? Lute-hate bi-bi anubo ya lo molaibo ha yama lemodoka ya inaiye. ⁹ Yagunu holilo. Lo molaibo ha ma fetó libo,

Hume-ugele ámilo. Wenina hofó beti fuliyámilo.
Idafa ugele liyámilo. Wenina idafatina yagunu holiyámilo,

loto ha mono lufuwau (Kis 20:13-17, Lo 5:17-21) nebo ha, ido lo molaibo ha ma eito-eito muki yama li mako ito ya fetó libo,

Heimokagunu holiyanibo yamaidana oto weni-
naka muki ya luka-haka bi-bi o mino,

loto ha mono lufuwau (Wkp 19:18) ya nebo ne. ¹⁰ Feito lute-hate bi-bi anubo, ya wenina li nosámibo o betinubo ma minámiye. E'e, lutina-

hatina bi-bi anabo ya lo molaibo ha meyaló molabo wenina ya minanae.

Fefe libo monako molanubo ha

¹¹ Ido fetó feyanae, loto ha ma lobinogolowe. Holilo. Lemo hana apito holi hikito muwonido ya li nomude waifa, ido onesa me ya hulawa moda alili aiboma nenako, yagunu uwo unaguti sinoinabo hamena onesa me ya ne, loti holiti ya fetó alo. ¹² Midipu ibo ya moda huloto, ho

lanogolo moda alili aibo yagunu midipu ibo mon-
ala li uwado fulitoto, lamena hiya-huwa mainafa-
anafa muki ya li minoto, ¹³ fefe loto fo lido
yaidana oto moniyokelo. No noto lute u hopa
aito ake ito u wanoba yonubo mona, hume-ugele
oto hopa li unanubo mona, moliya fito wauwa
linubo mona muki yalo ya moniyámokelo. ¹⁴ E'e,
utinalo owo holoiyabo yaidana oti ya Wenabate
Yesu Kilisto liti emodoka keloti minalo. Ido utina-
lutina-hatina dowa loti holibo monakafo ika o
ledotanaiye, loti ya aya monalo hatina fulámilo.

14

*Holi hikitabo wenina eito ya holi nosámibo
biyámanubo ha*

¹ Ena holi hikitabo monatina auba iyámibo
weninagi ya houna iyalo. Feto feti ya hatina loiti-
loiti kiyabo mona yagunu moliya fi bito lifefe
lo betinune, loti ladámoti, aifa emotinagi houna
iti minalo. ² Wenina masi idafa-adafa muki
aifa nanune, loti holi hikitoti no holiyabo nefa,
ido holi hikitabo monatina auba iyámibo wenina
yasi hafa moi iti, hoba-hobina yako no holiyabo
ne. ³ Hemotina idafa-adafa muki no holiyabo
wenina yasi idafa ma moi iyabo wenina lutina-
hatinau holi nosámibo biyámilo. Ido hemotina
idafa ma moi iyabo wenina yasi idafa-adafa no
holiyabo wenina ya mona nosámibo molo minae,
loti lo betiyámilo. Gotikafo hemotina loitiwagi ya
houna i betinako, yagunu holi nosámibo liwila-
awila ámilo. ⁴ Hemokafo we ma houba-nabala
we monala nosámiye, loto lo edanibo, ya hema
minoto feti lane? Eimola wenabala onobalalo

ya lumu fou lanaife, ido auba ito minanaiye. Ido Wenabakafo li auba i edanaibo aubala mino edainako, moda auba ito minanaibo ne.

⁵ Ido wenina masi hamena yagunu holiyabo, ya hamena ma ya foli hamena naba nefa, ido ma ya aifa hamena ne, loti holiyafa, ido maleka yasi hamena muki moda ayaidako ne, loti holiyabo ne. Weninawa muki ya eimotina lutina-hatinau holinado ya moda holi hikitalo. ⁶ Foli hamena naba ma ne, loti holiyabo wenina ya Wenaba huliya li faka loti feto loti holiyabo ne. Ido idafa-adafa muki no holiyabo wenina ya dowae, lalowe, loti Goti lomuti ya no holiyabo yagunu moda Wenaba huliya li faka loti no holiyabo ne. Ido idafa ma moi iyabo wenina ya ayaidana oti dowae, lalowe, loti Goti lomuti, ya Wenaba huliya li faka loti moi iyabo ne.

⁷ Holi minafe? Lemo mono wenina muki yauti ma eimolagunuko minanaibo ya ma minámiye. Ido ma eimolagunuko fulinaibo yagi ya ma minámiye. ⁸ Hofawa minanubo ya Wenaba huliya li faka lotoko minone. Ido fulinubo ya Wenaba huliya li faka lotoko fuliyone. Yagunu ya hofawa minanubofe, ido fulinubofe? Moda Wenaba weninala ya minone. ⁹ Aya yagunu ya Kilisto fulitoto fuliguti sinoibo, ya fuliyabo wenina ido hofawa minionibo wenina maina Wenabate minanowe, loto fulitoto fuliguti sinoibo ne.

¹⁰ Yagunu hemotina masi mono weninatina ma monatina nosámiye, loti lo betiyabo ya neidafaiti feto lo betiyae? Ido hemotina eito ma mono weninatina lutina-hatinau holi nosámibo biyabo ya neidafaiti holi nosámibo bi minae? Lemo muki

ya Gotikafo li halo molo ledanaibo ebalalo ya sinoinogolone, loto holiyone. ¹¹ Aya yagunu ya fetu libo,

Mikalo-mikalo wenina muki ya hidina obula fi numuti wetinakafo Goti ne, loti lo oloto molanigilae, loto nemo hofawa minowa-minowa oto minobo yamaidana oto ya hawa gedibo ya lobiyowe, loto Wen-abakafo libo ne,

loto ha mono lufuwau (Ais 49:18, 45:23) ya nebo ne. ¹² Feito ya leimo muki ya Gotidoka mako mako uto, leimo monate yagunu lo oloto mologeto ya fefe loto holito loga-miga o ledanogolaiye.

Weninate ya monate wati lumu fou lotanae, loto wato moninubo ha

¹³ Feito ya weninate monatina feito-feito nosámiye, loto hofa lo betiyámokelo. E'e, mono weninate maleka ya monate wati uteba iti lumu fou lotanae, loti heimotina monatina yagunu hatina kifefe loti moni minalo.

¹⁴ Ena nemo ya Wenaba Yesu lulau mino edobo we yakafo auba ito fetu loto holifefe lo minowe: Idafa-adafa mona-mona nanubo li fuma i ledanaibo idafa ma minámiye. E'e, ma minámifa, ido we makafo ya idafa me ya li fuma i nedanaiye, loto holito, ido hopa nanaibo, ya eimola hala feito holibo yamo li fuma i edanaibo ne. ¹⁵ Yagunu holilo. Hemo ya weka-idafa nananibo, ya mono weninaka ma wa hedoto hala loiti-loiti kito lula-hala hena holiyagetoma, ya luka-haka muwanibo hanuma heleu otane. Holi minabe? Kilisto ya mono weninaka yagunu

holito fulima nenako, igaidana oto aifa nanowe, loto, noto weninaka ya li hopa o betiyane? Feto fe betiyámilo. ¹⁶ Hemotina ya mona aifa dowá molone, loti holiyafa, ido wenina ma wa betiti holi nosámotanae, loti ya wati hiyaba oti monilo.

¹⁷ Yagunu holilo. Goti ya hiyabate we wehudi hilalau minonibo mona ya wete-idafa ido nogi no holinubo mona ma minámiye. E'e, Goti ya hiyabate wehudi hilalau minonibo mona ya fefe libo mona, you amena mona, Weuna Fele lulau mino edoto dowá loto holinubo mona ya ne.

¹⁸ Yagunu hemotina ya feti moniti Kilisto houbanaba o edanabo, ya Gotikafo dowá wa betiyageto, ido wenina yagi monatina dowá wa edanigilae.

¹⁹ Feito ya you amena mona molanubo hanu, ido weninate weudina-lutina-hatina li auba i betinubo hanu ya auba ito moni wita okelo.

²⁰ Wetina-idafa magunu holiti ya Goti ononala li hopaitámilo. Idafa-adafa muki ya moda hiluwa libo, aifa nanubo idafa nefa, ido we makafo hala loiti-loiti kito hopa nanaibo, ya idafawa yaloti uteba iyageto li nosámibo o edanaibo ne.

²¹ Yagunu ya hafa ma nanabofe, ido no waini ma nanabofe, ido mona eito-eito molanabo yagunu mono weninatina ya uteba itanae, loti weninatina yagunu holiti moi inabo, ya mona dowá molanigilae. ²² Idafa magunu holi hikitabo ya moda Goti onobalalo ya heimotina lutina-hatinau yako holi hikito minalo. We makafo idafa ya dowá ma nenako, yagunu lifima ha mino nedámibo ne, loto holifefe lanaibo we ya moda dowá loto holito minomo unaibo nefa, ²³ ido hala loiti-loiti kibo we yakafo hopa nanaibo, ya holi

hiki ladáminako, yagunu lifima ha moda mino edaibo ne. Holi minafe? Mona magunu holi hiki ladámoto hopa molanubo, ya aya mona ya nosámibo mona, lifima li lumunaibo mona ya ne.

15

Yesu monala yagunu holito ege molanubo ha

¹ Lemo holi hikitonibo monate gedibo wenina ya leimogunuko holiyámoto, mono weni-nate gedámabo wenina ya auba iyámabo yagunu holito adina li faka lanubo, ya dowa lanaiye.

² Leimo muki ya weninate dowa lanae, loto, ido monolo betinae, loto hate ki bito adina li faka lo betiyokelo. ³ Feito Kilisto yagi eimolagunuko holiyámoto, Melafo fetu loto lomuibo,

Wenina soka hamaga hiyabo ha ya nemodoka kelaibo ne, loto ha mono lufuwau (Sng 69:9) nebo ha ya monala lilibibo ne.

⁴ Yagunu holilo. Homu aidena yoimalokati ha mono lufuwa imo yowabo, ya aya lufuwa yakafo lute-hate li aila i ledageto, ya emogunu holito hiyabala anubo mona ya auba ito molomo yonae, loto Gotikafo ha muki aya lufuwau iyabo yakafo api itibinaiye, loto hawa bito, lufuwa iyabo ne.

⁵ Ido Goti ya li auba i ledaibo yawala ido lute-hate li aila i ledaibo yawala yakafo hemotina muki weudina-lutina-hatinau onona liyageto, ya Kilisto Yesu monala moloti lutina-hatina u mako uto, ⁶ wetina mako uwageto ya Wenabate Yesu Kilisto Melafo Goti huliya li faka lanae.

Kilistokafo wenina muki adina li faka lo betiboha

⁷ Feito ya Kilistokafo lemogi houna ibo ya-
maidana oti hemotina ya Goti weninala muki
yagi houna iyalo. Aya mona yakafo Goti huliya
li faka lanogolaiye. ⁸ Aya yagunu lobiyowe.
Holilo. Kilistokafo Goti hala ona hula yagunu
holito, ya Goti anela utinau fukabo Yuda wenina
awatinafo-holofatina ha lo molo bibo halo inaiye,
loto adina li faka libo onona li betibo ne. ⁹ Feto
fe betibo, ya eito feka wenina yagi milumatina
holibo monawa ya wati Goti huliya li faka lanae,
loto feto fe betibo ne. Aya yagunu ha mono
lufuwau ya ha ma feto libo,

Feito ya eito feka wenina minagu yau heboka
loto, hulika li faka lanaibo nama lo mi-
nanogolowe,

loto (Sng 18:49), ¹⁰ ido ha ma feto libo,

Hemotina eito feka wenina yagi eimola weni-
nalagi maina lutina-hatinau dowa loti ho-
lilo,

loto (Lo 32:43), ¹¹ ido ha ma feto libo,

Hemotina eito feka wenina muki ya Wenaba
ebola-abola lilo. Mikau-mikau minabo
wenina muki ya huliya li faka lanae,

loto (Sng 117:1), ¹² ido ha ma Aisaiyakafo feto libo,

Yesi yufa fibo wenina yauti we ma oloto pito
anaibo, ya yoto minoto u mikau-mikau
minabo wenina hiyabatina we wenaba mi-
nanaibo, ya eito feka wenina emogunu
holiti hiyabala anae,

loto (Ais 11:10) ha mono lufuwau ya nebo ne.

¹³ Ena emogunu holito hiyabala o-o minonibo mona yawala Goti yakafo holi hikito munagu yau you amena mona ido dowa holinabo mona ya lutina-hatinau molo faito betinaibo, ya Weuna Fele aubala yakafo emogunu holiti hiyabala anabo mona hulawa ya li oloto pi betimo yonaiye.

Polokafo mono onona libo yagunu lula-halau dowo loto holibo ha

¹⁴ Ena mono weninane-motao, heimotina ya mona dowo mino faito betibo, ya holinabo ha muki hatina-manadinau molo faito betinako, mono weninatina api itibife lanabo aubala ya mino betibo ne, loto neimo hemotinagunu holito ya hane loiti kiyámoto, moda holife lo minowe. ¹⁵⁻¹⁶ Ido Gotikafo nemo eito feka wenina minado ya uto Kilisto Yesu houba-nabala we minanane, loto aifa li dowo lo ledaibo monala numibo yagunu lufuwa meu ya ha ma hatina molotanaiye, loto auba ito hatina lito, feti-feti mona molalo, loto hawa i fulo betiyowe. Ido ononala liyobo, ya Weuna Felekafo eito feka wenina li Goti fele weninala o betiyageto, ya Goti onobalalo dowo lanabo wenina munowe, loto sokila hi muwabo yaidana oto ya Goti hala ukuwa dowo lo oloto molowe.

¹⁷ Yagunu Goti ononala liyobo, ya Kilisto Yesu lulau mino edoto lune-haneu dowo loto holitoko li minowe. ¹⁸ Idafa magunu ya ha ma ladámanogolowe. Idafa mako, Kilistokafo nemodoka mino nedaito ononala liyobo yagunuko lanogolowe. Eito feka wenina holiti hololanae, loto emokafo mino nedaito, ya hawa ukuwa lo oloto moloto, ononawa lito, ¹⁹ Weuna

aubala mino nedaibo yakafa Goti aubala itibinowe, loto idafa ma li oloto pi betiyoto muludina yoibo mona molobo, ya Yelusalemu numudoti uto loto eba nedo-nedo monimo uto uto faiga Ililikumu ebalo lo fedobo, yalo yagi Kilisto hala ukuwa dowá ya holinae, loto lo oloto molobo ononawa ya li hulowe. ²⁰ Feito liyobo, ya we makafo numuna lagi fitaido ya nemo homi ito huwámanogolowe, loto Kilisto huliya yagunu holiyámábo ebalo ya hawa ukuwa dowá lo oloto molanowe, loto auba ito holito, ya ononawa liyowe. ²¹ Aya yagunu ya fetó libo, Emogunu ha ma lo oloto molo biyámábo wenina ya holinigilae. Ido hala ukuwa holiyámábo wenina ya holifefe lanigilae, loto ha mono lufuwau (Ais 52:15) ya nebo ne.

Polokafo Lomu wenina minadoka anowe, loto lobibo ha

²² Aya yagunu ya hemotinaloka yagi anowe, loto holiyobo, ya hamena-hamena hanu hu nedaito minofa, ²³ ido onesa me ya ya eba melo ononawa linobo ma mináminako, aidenati hemotinaloka anowe, loto holiyobo yagunu ya ²⁴ aliga hefola Sipeni ebalo unowe, loto hanu hofalalo hemotinagi houna ito nomunegunu wa betito, lune-haneu dowá loto holito mino holimo yoto, hemotina ane li faka lanado ya Sopenidoka unobo ne.

²⁵ Yalo unobo nefa, ido onesa fetó-namato ya Yelusalemuka uto ya Goti fele weninala yalo minabo ya adina li faka lanowe, loto uwowe.

²⁶ Aya fele weninawadoka ya inagunu fuliyabo

hamena naba ya lo fedibo, yagunu mono wenina Masedonia ebalo ido Akaiya ebalo minabo yasi hefana-huwamenatina yauti ma binune, loti dowa loti holiti nuba o beti holiyabo, ²⁷ ya aya Yuda wenina mono idafatina yauti Gotikafo eito feka wenina biboma nenako, yagunu aya weninawa mikaloka idafatina yauti lifima liwilati Yuda wenina adina li faka loti binune, loti dowa loti holiti, feti lifima biyaboma ya liwilati binabone.

²⁸ Feti idafatina yauti li nuba o betimo uti, mono mona hulawa anelo moda molato, ya onesa nemo weninawa binowe, loto lito uto bitoto, ²⁹ yaloti Sipenika unowe, loto hanu hofalalo ya hemotina wa betinogolowe. Feito hemotinaloka anobo ya aifa amanogolowe. Kilstokafo li dowa lo ledomo yoibo mona weude-lute-hateu molo faitanaiye, loto anogolowe.

³⁰ Ena mono weninane-motao, hatina lito ha auba ito lobiyobo ya holilo. Hemotina Wenabate Yesu Kilisto yagunu holiti, ido Weunakafo lutehate bi-bi onibo mona li oloto pi lumibo yagunugi holiti, ya ane li faka loti nemogi Goti lomu-lomubo ononawa ya maina auba ito linune, loti nemogunu holiti lomuilo. ³¹ Feto feyanabo, ya Yudia ebalo ha holiti holiyámoti abo wenina adinauti ya li nomune wa nedo, loto lomuwobo, ido fele weninala Yelusalemudoka minabo ya adina li faka lanobo ononawa ya dowa loto wa edanae, loto lomuwobo, ya hemotina maina ayaidana oti lomuilo. ³² Feito ya Goti dowa loto holiyageto ya hemotinaloka loto, lune-haneu dowa loto holito hemotinagi mino holinowe.

³³ Ena Goti you amena mona yawala ya hemotinagi muki mino betinaiye. Ona.

16

Aiyo-weiyo ha ma fulo betibo ha

¹⁻² Ena mono atotefo Fibi ya Senkilia numudoka monolo nuba o-o abo wenina houba-naba o beti-beti aibo wena nebo yakafo nemogi ido mono weninala muki ade li faka libo wenama nenako, yagunu hemotinaloka anaido ya Wenaba lulau mino edoti fele wenina mona molofe lo betinabo mona ya molo edoti emogi houna iti, ya idafa magunu holinaibo ya ana li faka lalo, loto huliya ido monala feito oloto pi biyowe.

³ Ena Kilisto Yesu lulau mino edoto onona maina liyonibo wena Pilisilate wanafo Akuilate ya aiyo-weiyo ha fulo betiyobo ya lobilo. ⁴ Loiti ya homu nemogunu holiti aifa fulinaiye, loti ane li faka laibo yagunu dowae, lalowe, loto holiyobo ya nemoko minámiye. Eito feka wenina eba nedo-nedo monolo nuba o-o abo wenina muki ya loiti yagunu holiti, dowae, lalowe, loti Goti lomu minae. ⁵ Ido loiti ya numunatinau monolo nuba o-o abo wenina muki yagi aiyo-weiyo ha fulo betiyobo ya lobilo.

Ena lune-hane muwobo we Epainetusi yagi aiyo-weiyo ha fulo edobo ya lomuilu. Emo ya Esia ebalu Kilisto holi hikito muwabo wenina yauti hana apito holi hikito muibo we ya ne.

⁶ Ido Malia ya hemotinagunu holito mono onona auba ito li gedibo wena yagi aiyo-weiyo ha fulo edobo ya lomuilu.

⁷ Ido neimo weninane Adolonikusite, Yuniyasite u homu molo nedoti Kilisto lulau mino edaibo we loiti ya aposolo onona libo we huliyagi we minoti, ya homu ya nemogi maina nala i ledabone. Aya we loiti yagi aiyo-weiyo ha fulo betiyobo ya lobilo.

⁸ Ido Wenaba lulau mino edoto lune-hane muwobo we Ampiliyatusi yagi aiyo-weiyo ha fulo edobo ya lomuilo.

⁹ Ido Kilisto lulau mino edoto onona maina liyonibo we Ubanusi, ido lune-hane muwobo we Sitakisi yagi aiyo-weiyo ha fulo betiyobo ya lobilo.

¹⁰ Ido Kilisto lulau mino edoto mono mona ona hula molomo yoibo we Apelesi yagi aiyo-weiyo ha fulo edobo ya lomuilo.

Ido Alistobulusi numunalau minabo wenina yagi aiyo-weiyo ha fulo betiyobo ya lobilo.

¹¹ Ido neimo weninane Helotiyoni yagi aiyo-weiyo ha fulo edobo ya lomuilo.

Ido Nasisusi numugu minabo yauti Wenaba lulau mino edabo wenina yagi aiyo-weiyo ha fulo betiyobo ya lobilo.

¹² Ido Wenaba lulau mino edoto mono onona auba iti libo wena loiti Tilifinate, Tilifosate ya aiyo-weiyo ha fulo betiyobo ya lobilo.

Ido lute-hate muwonibo wena, Wenaba lulau mino edoto auba ito mono onona libo wena Pesisu yagi aiyo-weiyo ha fulo edobo ya lomuilo.

¹³ Ido Wenaba lulau mino edaibo we dowalama Lufusi, ido olafo ya nemo onefo yaidana oto nebo wena yagi aiyo-weiyo ha fulo betiyobo ya lobilo.

14 Ido wemoli ma Asinkilitusile, Filegonile, Hemesile, Patolobasile, Hemasile, ido mono weninatina ma mino betiyabo wemoli magi, ya aiyo-weiyo ha fulo betiyobo ya lobilo.

15 Ido we wena Filologusile Yuliale, ido we ma Neleusi emonalale, ido Olimpasile, ido fele wenina mino betiyabo muki yagi aiyo-weiyo ha fulo betiyobo ya lobilo.

16 Ena hemotina mono weninatina wa betiti aiyo-weiyo ha lobiti ya fele mona moloti abusa i betilo.

Eba negu-negu ya monolo nuba o-o abo wenina muki yasi aiyo-weiyo ha ya hemotina fulo beti minae.

Mono li hopaitabo wenina yagunu lobibo ha

17 Ena mono weninane-motao, nemo hatina lito ha me ya auba ito lobiyowe. Holilo. Hemotina api itibiyonibo ha holifefe loti holiyabo, ya wenina masi ladámoti, eito, ika oti hona molo foki betinabo ha lanabo wenina ya wa betifefe loti, metina bilo. 18 Yaidana wenina yasi Wenabate Kilisto houba-naba o edámae. E'e, eimotina utina-lutina-hatina houba-nabala onona liti, ya la fulibo ha, ha magu sugi loti ya monatina holifefe ladámabo wenina lutina-hatina hola i beti minae. 19 Ido hemotina hololabo monatina yamagunu wenina muki holiyanako, yagunu hemotinagunu holito lune-haneu dowá loto holiyowe. Feito mona dowá molanabo ha manadiná minágeto, ido nosámibo mona yagunu holiyámana, loto lune-haneu ya hemotinagunu holiyowe.

²⁰ Ena you amena mona yawala Gotikafo hamena fana aguwámágeto ya Satani fulo hidina feumau itageto lala i edanigilae.

Wenabate Yesu aifa li dowá lo ledaibo monala ya hemotinaloka mino betinaiye.

Aiyo-weiyo ha ma lobibo ha

²¹ Ena mono onona maina liyoibo we Timoti, ido neimo weninane Lusiusile, Yesonile, Sospatale yasi aiyo-weiyo ha ya hemotina fulo beti minae.

²² Ido nemo Tetiusi ya Polo welaloti lito neimo anekafo lufuwa me ya iyobo we yagi Wenaba lulau mino edoto aiyo-weiyo ha ya hemotina fulo beti minowe.

²³⁻²⁴ Ido Gaiyusi yagi aiyo-weiyo ha ya hemotina fulo beti ne. Emo numunalau ya nemogi ido monolo nuba o-o abo wenina muki yagi aifa li dowá lo ledoledo aibo ne.

Ido numuna meya naba me ya hefana hiyaba aibo we Elastusi ido mono wete ma Kuatusi yagi aiyo-weiyo ha ya hemotina fulo beti ne.

[Wenabate Yesu Kilisto aifa li dowá lo ledaibo monala ya hemotina muki mino betinaiye. Ona.]

Goti huliya li faka lanubo ha

²⁵ Ena Goti li auba i hiki lo betinaibo aubala moda mino edaibo ne, loto Yesu Kilisto hala ukuwa, lo oloto molo-molo obo hawa ukuwa dowá yakafo fetó libo ne. Aya hawa ukuwa, faluku ibo ha ya aidena monau yoimati lo oloto molámifa, ²⁶ ido onesa me ya ya polofeti we lufuwa iyagu ya minowa-minowa omo yoibo we Goti lo molaibo halo ya mikalo-mikalo wenina muki ya holifefe loti, holi hikitoti hololanae, loto

li oloto pi betibo ne. ²⁷ Aya ha mananau nebo we Goti mako yako Yesu Kilisto yagunu ya huliya naba-naba mino edaiboma ya moda minomo yoto minowa-minowa oto nebo ne. Ona.

Goti Ukuwala Hala
The New Testament in the Lambau Dialect of the
Siane Language of Papua New Guinea
Nupela Testamen long tokples Siane-Lambau long
Niugini

copyright © 1997 Wycliffe Bible Translators, Inc.

Language: Siane-Lambau (Siane)

Dialect: Lambau

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

PDF generated using Haiola and XeLaTeX on 22 Feb 2024 from source files dated 31 Aug 2023

293a493a-a8ae-5f22-be32-d1a5995e2a0e